

元史



志卷第一

元史

翰林學士聖大夫知制誥兼修國史臣宋濂翰林待制直學士無國史院編修官臣三善等奉

勅修

天文一

司天之說尚矣易曰天垂象見吉凶聖人象之又曰
觀乎天文以察時變自古有國家者未有不致謹於
斯者也是故堯命羲和曆象日月星辰舜在璿璣玉
衡以齊七政天文於是有所測驗之器焉然古之為其
法者三家曰周髀曰宣夜曰渾天周髀宣夜先絕而
渾天之學至秦亦無傳漢洛下閎始得其術作渾儀

及測天厥後歷世遞相沿襲其有得有失則由乎其人智術之淺深未易遽數也宋自靖康之亂儀象之器盡歸于金元與定鼎于燕其初襲用金舊而刻象不協難復施用於是太史郭守敬者出其所創簡儀仰儀及諸儀表皆臻於精妙卓見絕識蓋有古人所未及者其說以謂昔人以管窺天宿度餘分約為大半少未得其的乃用二線推測於餘分纖微皆有可考而又當時四海測量之所凡二十有七東觀高麗西至漠池南踰朱崖北盡鐵勒是亦古人之所未有者以謂司天之官遵而用之難可

後雲氣等事其係於天文古候者具有簡冊存焉若昔言馬遷作天官書班固范曄作天文志其於星辰名號分野次舍推步候驗之際詳矣及晉隋二志實唐李淳風撰於夫二十八宿之躔度二曜五緯之次舍時日灾祥之應分野休咎之別號極詳備後有作者無以尚之矣是以歐陽脩志唐書天文先述法象之具次紀日月食五星凌犯及星變之異而凡前史所已載者皆畧不復道而近代史官志宋天文者則首載儀象諸篇志金天文者則唯錄日月五星之變

誠以環衛之制載於書日星風雨霜電雷霆之定異
載於春秋慎而書之非史氏之法當然固所以求合
於聖人之經者也今故據其事例作元天文志

簡儀

簡儀之制四方為跌縱一丈八尺三分去一以為廣跌
面上廣六寸下廣八寸厚如上
廣中布橫軌三縱軌
三南二北抵南軌北一南抵中
軌跌面四周為水渠
深一寸廣加五分四隅為礎出
跌面內外各二寸繞
礎為渠深廣皆一寸與四周渠
相灌通又為礎於卯
酉位廣加四縱長加廣三之二
水渠亦如之北極雲

架柱二徑四寸長一丈二尺八寸下為齧雲植於乾
艮二隅礎上左右內向其勢斜准赤道合貫上規規
環徑二尺四寸廣一寸五分厚倍之中為距相交為
斜十字廣厚如規中心為竅上廣五分方一寸有半
下二寸五分方一寸以受北極樞軸自雲架柱斜上
去跌面七尺二寸為橫軌自軌心上至竅心六尺八
寸又為龍柱二植於卯酉礎中分之北皆飾以龍下
為山形北向斜植以柱北架南極雲架柱二植於卯
酉礎中分之南廣厚形制一如北架斜向坤巽二隅
相交為十字其上與百刻環邊齊在辰巳未申之間

兩廂侯謝修
南傾之勢準赤道各長一丈一尺五寸自跌面斜上三尺八寸爲橫軌以承百刻環下邊又爲龍柱二植於坤巽二隅礎上北向斜柱其端形制一如北柱四游雙環徑六尺廣二寸厚一寸中間相離一寸相連於子午卯酉當子午爲圓竅以受南北極樞軸兩面皆列周天度分起南極抵北極餘分附于北極去南北樞竅兩旁四寸各爲直距廣厚如環距中心各爲橫闊東西與兩距相連廣厚亦如之闕中心相連厚三寸爲竅方八分以受窺衡樞軸窺衡長五尺九寸四分廣厚皆如環中腰爲圓竅徑五分以受樞軸衡

兩端爲圭首以取中縮去圭首五分各爲側立橫耳高二寸二分廣如衡面厚三分中爲圓竅徑六分其中心上下一線界之以知度分百刻環徑六尺四寸面廣二寸周布十二時百刻每刻作三十六分厚二寸自半已上廣三寸又爲十字距皆所以承赤道環也百刻環內廣面卧施圓軸四使赤道環旋轉無滯滯之患其環陷入南極架一寸仍釘之赤道環徑廣厚皆如四游環面細刻利舍國天度分中爲十字距廣三寸中空一寸厚一寸當心爲竅竅徑一寸以受南極樞軸界衡二各長五天九寸四分廣三寸衡首

兩廂侯謝修
斜刻二分刻度分以對環面中腰為竅重置赤道環
南極樞軸其上衡兩端自長竅外邊至衡首底厚倍
之取二衡運轉皆着環面而無低昂之失且易得度
分也二極樞軸皆以鋼鐵為之長六寸半為本半為
軸本之分寸一如上規距心適取能容軸征一寸北
極軸中心為孔孔底橫穿通兩旁中出一線曲其本
出橫孔兩旁結之孔中線雷三分亦結之上下各穿
一線貫界衡兩端中心為孔下洞衡底順衡中心為
渠以受線直入內界長竅中至衡中腰復為孔自衡
底上出結之定極環廣半寸後倍之皆勢穹隆中徑

六度度約一寸許極星去不動處三度僅容轉周中
為斜十字距廣厚如環連於上規環距中心為孔徑
五釐下至北極軸心六十五分又置銅板連於南極
雲架之十字方二寸厚五分北面刻其中心存一釐
以為厚中為圓孔徑一分孔心下至南極軸心亦六
寸五分又為環二其一陰緯環面刻方位取跌面縱
橫軌北十字為中心卧置之其一曰立運環面刻度
分施於北極雲架柱下當卧環中心上屬架之橫軌
下抵跌軌之十字上下各施樞軸令可旋轉中為直
距當心為竅以施規衡令可俯仰用窺日月星辰出

地度分右四游環東西運轉南北低昂凡七政列舍中外官去極度分皆測之赤道環旋轉與列舍距星相當卽轉界衡使兩線相對凡日月五星中外官人宿度分皆測之百刻環轉界衡令兩線與日相對其下直時刻則盡刻也夜則以星定之比舊儀測日月五星出沒而無陽經陰緯雲柱之映其渾象之制圜如彈丸徑六尺縱橫各畫周天度分赤道居中去二極各周天四之一黃道出入赤道內外各二十四度弱月行白道出入不常用竹篾均分天度考驗黃道所交隨時遷徙先用簡儀測到入宿去極度數按於

其上校驗出入黃赤二道遠近踈密了然易辨仍參以筭數爲準其象置於方匱之上南北極出入匱面各四十度太强半見半隱機運輸牙隱於匱中

仰儀

仰儀之制以銅爲之形若釜置於輓臺內畫周天度曆列十二辰位蓋俯視驗天者也其銘辭云不可體形莫天大也無競維人仰釜載也六尺爲深廣自倍也兼深廣倍絜釜充也環鑿爲沼準以漑也辨方正位曰子卦也衡縮度中平斜再也斜起南極平釜斂也小大必周入地畫也始周浸斷浸極外也極入地

深四十大也北九十一赤道斷也列刻五十六時配也衡竿加卦巽坤內也以負縮竿本午對也首旋璣板窾納芥也上下懸直與鐵會也視日透光何度在也暘谷朝賓夕餞昧也寒暑發歛驗進退也薄蝕起自鑿生殺也以避赫曦奪日害也南北之徧亦可槩也極淺十五林邑界也黃道夏高人所載也夏末冬短猶少差也深五十奇鐵勒塞也黃道浸平冬晝晦則夏則不沒末短最也安渾宣夜所穹蓋也六天之書言殊話也一儀一揆孰善悖也以指爲告無煩喙也闡資以明疑者沛也智者是之膠者怪也古今巧

曆不億輩也非讓不爲思不逮也將窺大朕造化愛也其有俊明昭聖代也泰山礪乎河如帶也黃金不磨悠久賴也鬼神禁勿銘壞也

大明殿燈漏

燈漏之制高丈有七尺架以金爲之其曲梁之上中設雲珠左日右月雲珠之下復懸一珠梁之兩端飾以龍首張吻轉目可以審平水之緩急中梁之上有戲珠龍二隨珠俛仰又可察準水之均調凡此皆非徒設也燈毬雜以金寶爲之內分四層上環布四神旋當日月參辰之所在左轉日一週次爲龍虎烏龜

之象各居其方依刻跳躍鏡鳴以應於內又次週分百刻上列十二神各執時牌至其時四門通報又一人當門內常以手指其刻數下四隅鐘鼓鉦鏡各一人一刻鳴鐘二刻鼓三鉦四鏡初正皆如是其機發隱於櫃中以水激之

正方案

正方案方四尺厚一寸四周去邊五分爲水渠先定中心畫爲十字外抵水渠去心一十畫爲圓規自外寸規之凡十九規外規內三分畫爲重規徧布周天度中爲圓徑二寸高亦如之中心洞底植臬高一尺

五寸南至則減五寸北至則倍之凡欲正四方置案平地注水于渠眠平乃植臬於中自臬景西入外規即識以墨影少移輒識之每規皆然至東出外規而止凡出入一規之交皆度以線屈其半以爲中即所識與臬相當且其景最短則南北正矣復徧閱每規之識以審定南北南北旣正則東西從而正然二至前後日軌東西行南北差少即外規出入之景以爲東西允得其正當二分前後日軌東西行南北差多朝夕有不同者外規出入之景或未可憑必取近內規景爲定仍校以累日則愈真又測用之法先測定

所在北極出地度卽自案地平以上度如其數下對南極入地度以墨斜經中心界之又橫截中心斜界爲十字卽天腹赤道斜勢也乃以案側立懸繩取正凡置儀象皆以此爲準

圭表

圭表以石爲之長一百二十八尺廣四尺五寸厚一尺四寸座高一尺六寸南北兩端爲池圓徑一尺五寸深二寸自表北一尺與表梁中心上下相直外一百二十尺中心廣四寸兩旁各一寸畫爲尺寸分以達百端兩旁相去一寸爲水渠深廣各一寸與南北

兩池相灌通以取平表長五十尺廣二尺四寸厚減廣之半植於圭之南端圭石座中入地及座中一丈四尺上高三十六尺其端兩旁爲二龍半身附表上繫橫梁自梁心至表顛四尺下屬圭面共爲四十尺梁長六尺徑三寸上爲水渠以取平兩端及中腰各爲橫竅徑二分橫貫以鐵長五寸繫線合於中懸錘取正且防傾墊按表短則分寸短促尺寸之下所謂分秒太半少之數未易分別表長則分寸稍長所不便者景虛而淡難得實影前人欲就虛景之中考求真實或設望筭或置小表或以木爲規皆取端日光

下徹表面今以銅爲表高三十六尺端挾以二龍舉一橫梁下至圭面共四十尺是爲八尺之表五圭表刻爲尺寸舊一寸今申而爲五釐毫差易分別

景符

景符之制以銅葉博二寸長加博之二中穿一竅若針芥然以方閭爲趺一端設爲機軸令可開闔楮其一端使其勢斜倚北高南下往來遷就於虛梁之中竅達日光僅如米許隱然見橫梁於其中舊法一表端測晷所得者日體上邊之景今以橫梁取之實得中景不容有毫末之差至元十六年己卯夏至景七丈六尺七寸四分

闕几

四月十九日乙未景一丈二尺三寸六分九釐五毫至元十六年己卯冬至晷景十月二十四日戊戌景七丈六尺七寸四分

闕几之制長六尺廣二尺高倍之下爲趺廣三寸厚二寸上閭廣四寸厚如趺以板爲面厚及寸四隅爲足撐以斜木務取正方面中開明竅長四尺廣二寸近竅兩旁一寸分畫爲尺內三寸刻爲細分下應圭面几面上至梁心二十六尺取以爲準闕限各各長二尺四寸廣二寸脊厚五分兩刃斜稠取其於几面

相符着限兩端厚廣各存二寸銜入几闔俟星月正中從几下仰望視表梁南北以爲識折取分寸中數用爲直景又於遠方同日闕測取景數以推星月高下也

西域儀像

世祖至元四年扎馬魯丁造西域儀像 咱秃哈刺吉漢言混天儀也其制以銅爲之平設單環刻周天度畫十二辰位以準地面側立雙環而結於平環之子午半入地下以分天度內第二雙環亦刻周天度而參差相交以結于側雙環去地平三十六度以爲

南北極可以旋轉以象天運爲日行之道內第三第四環皆結於第二環之去南北極二十四度亦可以運轉凡可運三環各對綴銅方釘皆有竅以代衡簫之仰窺焉 咱秃朔八台漢言測驗周天星曜之器也外周圓牆而東面啓門中有小臺立銅表高七尺五寸上設機軸懸銅尺長五尺五寸復如窺測之簫二其長如之下置橫尺刻度數其上以準掛尺下本開圖之遠近可以左右轉而周窺可以高低舉而徧測 魯哈麻亦渺凹只漢言春秋分晷影堂爲屋二間春開東西橫罅以斜通日晷中有臺隨晷影南高

北下上仰置銅半環刻天度一百八十以準地上之
半天斜倚銳首銅尺長六尺闊一寸六分上結半環
之中下加半環之上可以往來窺運側望漏屋晷影
驗度數以定春秋二分 魯哈麻亦木思塔餘漢言
冬夏至晷影堂也爲屋五間屋下爲坎深一丈二尺
春開南北一罅以直通口晷隨罅立壁附壁懸銅尺
長一丈六寸壁仰畫天度半規其尺亦可往來規運
直望漏屋晷影以定冬夏二至 苦來亦撒麻漢言
渾天圖也其制以銅爲丸斜刻日道交環度數于其
腹刻二十八宿形於其上外平置銅單環刻周天度

數列于十二辰位以準地而側立單環二一結于平
環之子午以銅丁象南北極一結于平環之卯酉皆
刻天度卽渾天儀而不可運轉窺測者也 苦來亦
阿兒子漢言地理志也其制以木爲圓毬七分爲水
其色綠三分爲土地其色白畫江河湖海脉絡貫串
於其中畫作小方井以計幅圓之廣袤道里之遠近
兀速都兒刺不定漢言晝夜時刻之器其制以銅
如圓鏡而可掛面刻十二辰位晝夜時刻上加銅條
綴其中可以圓轉銅條兩端各屈其首爲二竅以對
望晝則視日影夜則窺星辰以定時刻以測休咎背

元史志卷一
嵌鏡片三面刻其圖凡七以辨東西南北日影長短
之不同星辰向背之有異故各異其圖以盡天地之
變焉

四海測

南海北極出地一十五度夏至景在表南長一尺一
寸六分晝五十四刻夜四十六刻

衡嶽北極出地二十五度夏至日在表端無景晝五
十六刻夜四十四刻

嶽臺北極出地三十五度夏至晷景長一尺四寸八
分晝六十刻夜四十刻

和林北極出地四十五度夏至晷景長二尺二寸四
分晝六十四刻夜三十六刻

鐵勒北極出地五十五度夏至晷景長五尺一分晝
七十刻夜三十刻

北海北極出地六十五度夏至晷景長六尺七寸八
分晝八十二刻夜一十八刻

大都北極出地四十度太強夏至晷景長一丈二尺
三十六分晝六十二刻夜三十八刻

上都北極出地四十三度少
北京北極出地四十二度強

益都北極出地三十七度少

登州北極出地三十八度少

高麗北極出地三十八度少

西京北極出地四十度少

太原北極出地三十八度少

安西府北極出地二十四度半強

興元北極出地三十三度半強

成都北極出地二十一度半強

西涼州北極出地四十度強

東平北極出地三十五度

大名北極出地三十六度

南京北極出地三十四度太強

河南府陽城北極出地三十四度太弱

揚州北極出地三十三度

鄂州北極出地三十一度半

吉州北極出地二十六度半

雷州北極出地二十度太

瓊州北極出地一十九度太

日薄食暈珥及日變

世祖中統二年三月壬戌朔日有食之三年十一

元史志卷一
月辛丑日有背氣重暈三珥 至元二年正月辛未
朔日有食之 四年五月丁亥朔日有食之 五年
十月戊寅朔日有食之 七年三月庚子朔日有食
之 八年八月壬辰朔日有食之 九年八月丙戌
朔日有食之 十二年六月庚子朔日有食之 十
四年十月丙辰朔日有食之 十九年六月己丑朔
日有食之 七月戊午朔日有食之 二十四年七月
癸丑日暈連環白虹貫之 十月戊午朔日有食之
二十六年三月庚辰朔日有食之 二十七年八
月辛未朔日有食之 二十九年正月甲午朔日有

食之有物漸侵入日中不能既日體如金環然左右
有珥上有抱氣 三十一年六月庚辰朔日食
成宗大德三年八月己酉朔日食 四年二月丁未
朔日食 六年六月癸亥朔日食 七年閏五月戊
十朔日食 八年五月癸未朔日食
武宗至大二年正月丁亥白虹貫日八月甲寅白虹
貫日 四年正月壬辰日赤如赭

仁宗皇慶元年六月乙丑朔日有食之 延祐元年
三月己亥白暈亘天連環貫日 二年四月戊寅朔
日有食之 五月甲戌日赤如赭乙亥亦如之 九月甲

寅日赤如赭戊午亦如之 三年五月戊申日赤如
赭 五年二月癸巳朔日有食之 六年二月丁亥
朔日有食之 七年正月辛巳朔日有食之三月乙
未日有暈若連環然

英宗至治元年三月己丑交暈如連環貫日六月癸
卯朔日有食之 二年十一月甲子朔日有食之
泰定帝泰定四年二月辛卯白貫貫日九月丙申朔
日食

文宗天曆二年七月丙辰朔日有食之 至順元年
九月癸巳白虹貫日 二年正月己酉白虹貫日八

月甲辰朔日有食之十一月壬申朔日有食之
年五月丁酉白虹並日出長竟天

元統元年三月癸巳日赤如赭閏三月丙申
癸丑甲寅皆如之 二年四月戊午朔日有食之

至元元年十二月戊午日赤如赭閏十二月丁亥戊
子巳丑皆如之 二年二月壬辰日赤如赭乙未丙

申亦如之三月庚申壬戌癸亥四月丁丑皆如之八
月甲戌朔日有食之十二月甲戌日赤如赭 三年

正月丁巳日有交暈左右珥上有白虹貫之二月壬
中朔日有食之八月癸未日有交暈左右珥上有白

虹貫之十月癸酉日赤如赭 四年閏八月戊戌日
赤如赭巳亥壬寅亦如之九月庚寅皆如之 五年
正月丙寅日有交暈左右珥上有白虹貫之二月辛
亥日赤如赭三月庚申辛酉四月丁未皆如之 至
正元年三月壬申日赤如赭 三年四月丙申朔日
有食之 四年九月丁亥朔日有食之 十年十一
月壬子朔日有食之 十三年九月乙丑朔日有食
之 十四年三月癸卯朔日有食之 十五年二月
丙子日赤如赭 十七年七月巳丑日有交暈連環
貫之 十八年六月戊辰朔日有食之十二月乙丑

朔日有食之 二十一年四月辛巳朔日有食之
二十五年三月壬戌日有暈內赤外青白虹如連環
貫之 二十六年二月丁卯日有暈左珥上有背氣
一道七月辛巳朔日有食之 二十七年十二月癸
卯朔日有食之

五年正月五星凌犯及星變上

憲宗六年六月太白晝見

世祖中統元年五月乙未熒惑入南斗留五十餘日

二年二月丁酉太陰掩昴六月戊戌太陰犯角八
月丙午太白犯歲星十一月庚午太陰犯昴十二月

辛卯熒惑犯房壬寅熒惑犯鈞鈴 三年十二月乙酉太白犯鈞鈴○至元元年二月丁卯太陰犯南斗四月辛亥太陰犯軒轅御女星五月丙戌太陰犯房巳亥太陰犯昴七月甲戌彗星出輿鬼昏見西北貫上台掃紫微文昌及北斗但見東北凡四十餘日十二月甲子太陰犯房 二年六月丙子太陰犯心宿天星 四年八月庚申填星犯天鐔距星壬午太白犯軒轅大星甲子歲星犯軒轅大星十一月乙巳填星犯天鐔距是 五年正月甲午太陰犯井二月戊子太陰犯天關巳丑太陰犯井 六年十月庚子太

陰犯星辰 七年正月巳酉太陰犯畢九月丁巳太陰犯井十月庚午太白犯右執法十一月壬寅熒惑犯太微西垣上將 八年正月辛未太陰犯畢三月丁亥熒惑犯太微西垣上將九月丙子太陰犯畢九年五月乙酉太白犯畢距星九月戊寅太陰犯御女十月戊戌熒惑犯填星十一月丁卯太陰犯畢十年三月癸酉客星青白如粉絮起畢度五車北復自文昌貫斗杓歷梗河至左攝提凡二十一日十一年二月甲寅太陰犯井宿十月壬戌歲星犯壘壁陣○十二年七月癸酉太白犯井辛卯太陰犯畢九

兩廂侯謝修
月巳巳太白犯少民巳卯太白犯太微西垣上將十
月癸丑太陰犯畢十一月丙戌太陰犯軒轅大星十
二月戊戌填星犯亢戊申太陰犯畢二十三年九月
辛亥太白犯南斗甲寅太白入南斗十二月乙卯太
陰犯填星辛酉熒惑掩鈎鈐十四年二月癸亥彗
出東北長四尺餘十五年二月丁丑熒惑犯天街
三月丁亥太陰犯太白戊子太陰犯熒惑十一月辛
亥太白熒惑填星聚于房十六年四月癸卯填星
犯鍵閉七月丙寅填星犯鍵閉八月庚辰太陰犯房
宿距星庚子歲星犯軒轅大星十月丙申太陰犯太

微西垣上將十一月癸丑太陰犯熒惑十七年四
月庚子歲星犯軒轅大星七月戊申太陰掩房宿距
星巳酉太陰犯南斗八月丙子太陰犯心宿東星甲
子太陰犯右執法并犯歲星十八年七月癸卯太
陰犯房宿距星閏八月癸巳朔熒惑犯司怪南第二
星庚戌太陰犯昴九月甲申太陰犯軒轅大星十一
月甲戌大陰犯五車次南星丁丑太陰犯鬼丁亥太
陰掩心十二月丙午太陰犯軒轅大星二十年正
月巳巳大陰犯軒轅御女庚辰太陰入南斗犯距星
二月庚寅太陰掩昴庚子太白犯昴壬寅太白犯昴

乙巳太陰犯心三月己未歲星犯鍵閉庚申太陰犯
井壬戌太陰犯鬼乙巳歲星犯易癸酉歲星掩房四
月己亥太陰犯房壬寅太陰犯南斗五月丙寅太陰
掩心七月丙辰太白犯井癸亥太陰犯南斗乙丑太
白犯井庚午熒惑犯司怪八月丙午太白犯軒轅丁
未歲星犯鈞鈴九月壬子太白犯軒轅少女戊午太
陰犯斗己巳太白犯右執法壬申太陰掩井癸酉熒
惑犯鬼甲戌太陰犯鬼熒惑犯積尸氣太白犯左熱
法十月丙申太陰犯昴十一月戊寅太白歲星相犯
十二月甲辰太陰掩熒惑二十一年閏五月戊寅

朔填星犯斗七月甲申太白犯熒惑九月癸巳太白
犯南斗第四星乙未太陰犯井十月己酉太陰犯軫
十一月丙戌太陰犯昴己丑太陰掩輿鬼庚子太陰
犯心二十二年二月辛亥太陰犯東井癸丑太陰
犯鬼壬戌太陰犯心八月癸丑太陰入東井十二月
己亥歲星犯填星二十三年正月壬午太陰犯軒
轅太民乙酉太陰犯氐二月丙午太陰犯井三月己
巳太陰犯婁五月己巳熒惑犯太微西垣上將庚辰
歲星犯壘壁陣乙酉熒惑犯太陰右執法六月丙辰
朔太白犯御女八月乙卯太白犯軒轅右角星九月

兩廂侯謝修
甲申太陰犯天關十月甲午朔太白犯右執法戊戌
太陰犯建星辛亥太陰犯東井甲寅太白犯進賢十
一月戊辰太白犯亢巳卯太陰犯東井辛巳歲星犯
壘壁陣十二月戊戌太白犯東咸丁未太陰犯東井
丁巳太陰犯氐二十四年正月甲戌太陰犯東井
乙酉太陰犯房二月庚子太陰犯天關辛丑太陰犯
東井閏二月癸亥太陰犯辰星甲申太陰犯牽牛三
月丙申太陰犯東井四月癸酉太陰犯氐甲戌太陰
犯房七月戊戌太陰犯南斗辛丑太陰犯牽牛壬寅
熒惑犯輿兔積尸氣甲辰熒惑犯輿鬼壬子太陰犯

司怪八月癸亥太白犯亢丙子填星南犯壘壁陣巳
卯太陰犯天關辛巳太陰犯東井甲申太白犯房九
月丁酉熒惑犯長垣庚子太白犯天江乙巳太陰犯
畢辛亥熒惑犯太陰西垣上將壬子太白犯南斗十
月壬戌太陰犯牽牛大星乙酉熒惑犯左執法十一
月壬辰太白犯壘壁陣太陰暈太白填星丙申熒惑
犯太微東垣上將庚子太白晝見丙辰熒惑犯進賢
十二月丙寅太陰犯畢太白晝見○二十五年正月
乙巳太陰犯角戊申太陰犯房三月丁亥熒惑犯太
微東垣上相戊子太陰犯畢巳亥太陰掩角四月戊

午太陰犯井五月戊申太白犯畢六月甲戌太白犯
井丁丑太陰犯歲星七月巳亥熒惑犯氐庚子太白
犯鬼乙巳太陰掩畢八月丙辰熒惑犯房巳未太白
犯軒轅大星九月癸未朔熒惑犯天江庚子太陰犯
畢癸卯熒惑犯南斗十二月辛酉太陰犯畢甲子太
陰犯井甲戌太陰犯亢熒惑犯壘壁陣○二十六年
正月辛丑太陰犯氐三月甲午太陰犯亢五月壬辰
太白犯鬼七月戊子太白經天四十五日辛卯太陰
犯牛乙未太陰犯歲星八月辛未歲星晝見九月戊
寅歲星犯井乙未太陰犯畢辛丑熒惑犯太微西垣

上將十月癸丑太陰犯牛宿距星甲寅熒惑犯右執
法閏十月丁亥辰星犯房巳丑太陰犯畢熒惑犯進
賢太陰犯井十一月丁巳熒惑犯亢戊辰太陰犯亢
○二十七年正月庚戌太白犯牛癸丑太陰犯井丁
卯熒惑犯房壬申熒惑犯鍵閉二月戊寅太陰犯畢
庚寅太陰犯亢三月壬子熒惑犯鈞鈴四月丙子太
陰犯井壬辰熒惑守氐十餘日五月乙丑太陰犯填
星六月巳丑熒惑犯房七月辛酉熒惑犯天江九月
癸卯歲星犯鬼十月辛巳太白犯斗十一月戊申太
陰掩填星辛酉太陰掩左執法十二月辛卯太陰犯

元 二十八年正月壬寅太白熒惑填星聚奎二月
癸未太陰犯左執法甲申太白犯昴三月丁未太陰
犯御女巳酉太陰犯右執法庚戌太陰犯太微東垣
上相乙卯太白犯五車四月乙未歲星犯輿鬼積尸
氣五月壬寅太陰犯少民甲寅太陰犯牛六月辛卯
太陰犯畢七月巳亥太白犯井八月丙寅太白犯輿
鬼丙子太陰犯牽牛癸未歲星犯軒轅大星戊子太
白犯軒轅大星并犯歲星癸巳太陰掩熒惑九月丙
辰熒惑犯左執法戊午太白犯熒惑辛酉歲星犯少
民十月丙戌太陰犯軒轅大星并御女巳丑太陰犯

太微東垣上相十一月甲辰太陰犯房丙午熒惑犯
亢丁未太陰犯畢庚申熒惑犯氏十二月庚辰太陰
犯御女癸未太陰犯東垣上相巳丑熒惑犯房庚寅
熒惑犯鈎鈐 二十九年正月戊申太陰犯歲星及
軒轅左角二月巳巳太陰犯畢四月丙子太陰犯氏
六月巳丑太白犯歲星閏六月戊申熒惑犯狗國七
月辛未太陰犯牛八月丁酉辰星犯右執法巳亥太
白犯房乙巳歲星犯右執法九月壬戌熒惑犯壘壁
陣辛巳太白犯南斗十月乙巳太陰犯井丁未太陰
犯鬼乙卯太陰犯氏十一月壬戌太陰犯壘壁陣巳

卯太陰犯太微東垣上將十二月庚子太陰犯井甲
辰太陰犯太微西垣上將三十年正月丙寅太陰
犯畢丁丑太陰犯氐庚辰歲星犯左執法二月壬辰
太陰犯畢乙巳熒惑犯天街庚戌太陰犯牛癸丑太
白犯壘壁陣三月辛未太陰犯氐四月癸丑太白犯
填星六月巳丑歲星犯左執法丙申太陰犯斗七月
甲子太陰犯建星辛丑太陰犯鬼八月甲午辰星犯
太微西垣上將甲辰太陰犯畢戊申太陰犯鬼九月
丁卯太陰犯畢十月庚寅彗星入紫微垣抵斗魁光
芒尺許凡一月乃滅丙申熒惑犯亢巳亥太陰犯天

門辛丑太陰犯井十一月乙丑太陰犯畢丁卯太陰
犯井庚子太陰犯鬼丙子熒惑犯鈞鈐戊寅歲星犯
亢十二月乙未太陰犯井三十一年四月戊申太
白晝見又犯鬼五月庚戌朔太白犯輿鬼六月丙午
太陰犯井八月庚辰太白晝見戌戌太陰犯畢太白
犯軒轅九月丁巳太白經天丙寅太陰掩填星辛未
太陰犯軒轅乙亥太白犯右執法太陰犯平道十月
壬午太白犯左執法癸巳太陰掩填星乙未太陰犯
井十一月巳酉太陰犯亢庚申太陰犯畢癸酉太白
犯房十二月癸未歲星犯房丁亥歲星犯鈞鈐壬辰

太陰犯鬼庚子太陰犯房又犯歲星

成宗元貞元年正月乙卯太陰犯填星又犯畢癸酉
歲星犯東咸二月癸未熒惑犯太陰壬辰太陰犯平
道癸卯太陰犯歲星三月庚戌太陰犯填星壬戌太
陰犯房四月庚寅太陰犯東咸閏四月癸丑歲星犯
房甲寅太陰犯平道乙卯太陰犯亢丁巳太陰掩房
五月丁亥太陰犯南斗七月丁丑太陰犯亢甲申歲
星犯房八月乙酉太陰犯牛壬子太陰犯壘壁陣九
月甲午太陰犯軒轅戊戌太陰犯平道十月辛酉辰
星犯房上戊辰星犯鍵閉戊辰太白晝見太陰犯房

十一月甲戌太白經天及犯壘壁陣乙酉太陰犯井
丁亥太陰犯鬼十二月丙辰太陰犯軒轅甲子太陰
犯天江○二年正月壬午太陰犯輿鬼丙戌太白晝
見丁亥太陰犯平道庚寅太陰犯鈎鈐二月丁未太
陰犯井三月乙酉太陰犯鈎鈐五月丁丑太陰犯平
道六月乙巳太白犯天關丁巳太白犯鎮星癸亥太
陰犯井七月壬午填星犯井太白犯輿鬼八月庚子
太陰犯亢太白犯軒轅癸卯太陰犯天江乙卯太陰
犯天街太白犯上將九月戊辰太白犯左執法壬申
太陰掩南斗丁丑太陰犯壘壁陣己丑太陰犯軒轅

兩廂候謝修
十一月丁丑太陰犯月星又犯天街庚辰太陰犯井
丁亥太陰犯上相戊子太陰犯平道壬辰太陰犯天
江十二月丁未太陰犯井乙卯太陰犯進賢○大德
元年三月戊辰熒惑犯井癸酉太陰掩軒轅大星五
月癸酉太白犯鬼積尸氣乙亥太陰犯房六月乙未
太白晝見七月庚午太陰犯房八月丁巳妖星出奎
九月辛酉朔妖星復犯奎十月戊午太白經天十一
月戊子太白經天十二月甲辰太白經天又犯東咸
丙午太陰犯軒轅甲寅太陰犯心閏十二月癸酉太
白犯建星丙子太白犯建星○二年二月辛酉歲星

熒惑太白聚危熒惑犯歲星辛未太陰犯左執法丙
子太陰犯心五月戊戌太陰犯心六月壬戌太陰犯
角七月癸巳太陰犯心八月壬戌太陰犯箕九月辛
丑太陰犯五車南星癸卯太陰犯五諸侯巳酉太陰
犯左執法十月壬戌太白犯牽牛戊寅太陰犯角宿
距星十一月巳亥太陰犯輿鬼辛丑辰星犯牽牛壬
寅太陰犯右執法十二月戊午太白經天巳未填星
犯輿鬼乙丑太白犯歲星太陰犯熒惑庚午填星入
輿鬼太陰犯上將甲戌彗出子孫星下巳卯入陰犯
南斗○三年正月丙戌太陰犯太白丁酉太陰犯西

兩廂侯謝修
垣上將戊戌太陰犯右執法乙巳太白經天三月乙巳熒惑犯五諸侯戊戌熒惑犯輿鬼四月巳未太陰犯上將丙寅填星犯輿鬼太陰犯心五月丙申太陰犯南斗巳亥太白犯畢六月庚申太陰掩房丁卯熒惑犯右執法壬申歲星晝見七月乙卯朔太白犯并丁未太陰犯輿鬼八月丁巳太陰犯箕戊辰太白犯軒轅大星巳巳太陰犯五車星九月壬辰流星色赤尾長尺餘其光燭地起自河鼓沒於牽牛之西有聲如雷乙未太陰犯昴宿距星丁酉太白犯左執法十月丙子太陰犯房十一月乙酉太白犯房○四年二月

月戊午太陰犯軒轅五月甲午太陰犯壘壁陣辛丑太白犯輿鬼太陰犯昴六月丁巳太白犯填星七月辛卯熒惑犯井八月癸丑太陰犯井甲子辰星犯靈臺上星閏八月庚辰熒惑犯輿鬼九月戊午太白犯斗壬戌太陰犯輿鬼甲子太白犯斗十二月庚寅熒惑犯軒轅癸巳太陰犯房宿距星○五年正月巳酉太陰犯五車壬子太陰犯輿鬼積尸氣辛酉太陰犯心二月巳卯太陰犯輿鬼三月戊申太陰犯御女丁卯熒惑犯填星巳巳熒惑填星相合四月壬申太陰犯東井五月鬼丑太陰犯南斗乙卯熒惑犯右執法

丁卯太白犯井六月甲申歲星犯司怪巳酉太白犯
輿鬼歲星犯井甲子太白犯輿鬼七月丙午歲星犯
井辛亥太陰犯壘壁陣庚申辰星犯太白八月壬辰
太陰犯軒轅御女乙未填星犯太微上將九月乙丑
自八月庚辰彗出井二十四度四十分如南河大星
色白長五尺直西北後經文昌斗魁南掃太陽又掃
北斗天機紫微垣三公貫素星長丈餘至天市垣巴
蜀之東梁楚之南宋星上長盈尺凡四十六日而滅
十月癸未太陰犯東井辛卯夜有流星大如杯色赤
尾長丈餘光燭地自北起近東徐徐而行分爲二星

前大後小相離尺餘沒於危宿十一月巳亥歲星犯
東井戊申太陰犯昴十二月甲戌歲星犯司怪辛卯
太陰犯南斗○六年正月壬戌填星犯太微西垣上
將二月庚午太陰犯昴三月壬寅太陰犯輿鬼癸卯
歲星犯井甲寅太陰犯鉤鈐四月乙丑朔太白犯東
井戊寅太陰犯心庚寅太白犯輿鬼六月癸卯朔填
星犯太微西垣上將乙亥太陰犯斗七月癸巳朔熒
惑填星辰星聚井庚子太陰犯心戊午太陰犯熒惑
八月乙丑熒惑犯歲星巳巳熒惑犯輿鬼辛巳太陰
犯昴壬午太白犯軒轅九月丙午熒惑犯軒轅癸丑

太陰犯輿鬼丁巳太白犯右執法十月壬午熒惑犯
太微西垣上將十一月辛亥填星犯左執法乙未辰
星犯房癸卯太陰犯昴巳酉太陰犯軒轅十二月庚
申朔熒惑犯填星乙丑歲星犯輿鬼乙亥太陰犯輿
鬼庚申熒惑犯太微東垣上相丑未太陰犯房○七
年正月戊戌太陰犯昴甲辰太陰犯軒轅二月戊寅
太陰犯心四月癸亥太陰犯東井丙寅太陰犯軒轅
乙亥歲星犯輿鬼太陰犯南斗甲申熒惑犯太微垣
右執法丁亥歲星犯輿鬼五月壬辰辰星犯東井閏
五月戊辰太陰犯心七月戊寅歲星犯軒轅巳卯太

陰犯井乙酉熒惑犯房八月巳巳太白犯氐甲午熒
惑犯東咸太陰犯牽牛乙巳歲星犯軒轅辛亥熒惑
犯天江九月丙寅太白晝見辛未熒惑犯南斗甲戌
太陰犯東井乙亥太白犯南斗壬午辰星犯氐十月
丁亥太白經天辛丑太陰犯東井十一月巳未太白
經天丙寅填星犯進賢戊辰太陰犯東井巳卯太陰
犯東咸十二月丙戌太白經天夜熒惑犯壘壁陣丙
申太陰犯東井辛丑太陰犯明堂丁未太陰犯天江
○八年三月乙丑自去歲十二月庚戌彗星見約盈
尺指東南色白測在室十二度漸長尺餘復指西北

掃騰蛇入紫微垣至是滅凡七十四日○九年正月
丁巳太陰犯天關甲子太陰犯明堂巳巳太陰東東
咸三月甲寅熒惑犯氐戊午歲星犯左執法四月庚
辰太陰犯井壬辰太白犯井五月癸亥歲星掩左執
法七月丙午熒惑犯氐甲寅太白經天丁卯熒惑犯
房八月辛巳太陰犯東咸乙未熒惑犯天江九月丁
巳熒惑犯斗十月丙戌太白經天十一月庚戌歲星
太白填星聚於亢癸丑歲星犯亢丙寅歲星晝見十
二月壬申太白經天丙子太陰犯西咸庚寅熒惑犯
壘壁陣巳亥辰星犯填星○十年正月丁巳太白犯

建星閏正月癸酉太白犯牽牛巳丑太白犯壘壁陣
二月戊午太陰犯氐三月戊寅歲星犯亢四月辛酉
填星犯亢六月癸丑太陰犯羅堰上星巳未歲星犯
亢七月庚辰太陰犯牽牛八月壬寅歲星犯氐熒惑
犯太微垣上將九月巳巳熒惑犯太微垣右執法壬
午熒惑犯太微垣左執法十月甲辰太白犯斗辛亥
太陰犯畢甲寅太陰犯井十一月辛未歲星犯房壬
申太陰犯虛甲戌熒惑犯亢戊子熒惑犯氐辛卯太
陰犯熒惑十二月壬寅太白晝見乙巳歲星犯東咸
戊午太陰犯氐○十一年六月丙午太陰犯南斗杓

星巳巳太陰犯亢七月壬午熒惑犯南斗九月癸酉
 太白犯右執法巳卯太白犯左執法十月乙巳太白
 犯亢巳酉熒惑犯壘壁陣甲寅大陰犯明堂巳未太
 陰犯太白十一月丁卯太白犯房丙子太陰犯東井
 乙酉太陰犯亢辛卯辰星犯歲星十二月丁巳填星
 犯鍵閉

武宗至大元年正月辛未太微犯井甲申太陰犯填
 星二月丁未太陰犯亢甲寅太陰犯牛距星三月乙
 丑太陰犯井五月癸未太白犯輿鬼七月庚申流星
 起自勾陳南至於大角傍尾跡約三尺化為白氣聚

於七公南行圓若車輪微有銳經貫索滅壬申太白
 犯左執法八月壬子太陰犯軒轅太民九月壬申填
 星犯房丙子太陰犯井癸未太陰犯熒惑十月辛丑
 太白犯南斗十一日庚申太白晝見癸亥熒惑犯亢
 巳巳太陰掩畢甲戌熒惑犯氏乙亥辰星犯填星閏
 十一月壬寅熒惑犯房丁未太陰犯亢十二月甲子
 太陰犯畢丙子太陰犯氏戊寅太白掩建星 二年
 二月巳巳太陰犯亢辛未太陰犯氏庚辰太陰犯太
 白三月戊戌太陰犯氏巳亥熒惑犯歲星丙午熒惑
 犯壘壁陣五月辛卯太陰犯亢六月乙卯太白犯井

癸酉辰星犯輿鬼乙亥太陰掩畢八月乙亥太陰犯
軒轅丁丑太陰犯右執法九月丙午太陰犯進賢十
月壬申太陰犯左執法十一月巳亥太陰犯右執法
庚子太陰犯上相辛丑熒惑犯外屏十二月庚申太
陰犯參癸亥辰星犯歲星辛未太白犯壘壁陣 三
年正月壬辰太陰犯軒轅御女甲午太陰犯右執法
丙申太陰犯平道二月辛亥熒惑犯月星庚申熒惑
犯平街太陰犯軒轅少民壬戌太陰犯左執法甲戌
太白犯月星三月甲申太陰犯井庚寅太陰犯氏丙
申太陰犯南斗丁未太白犯井甲寅太陰犯軒轅御

女戊辰太白晝見五月乙酉太陰犯平道癸巳熒惑
犯輿鬼六月乙卯太陰犯氏七月戊寅太陰犯右執
法巳卯太陰犯上相八月甲子太白犯軒轅太民乙
丑太陰掩畢大星辛巳太陰犯建星辛卯太陰犯天
廩十月甲辰朔太白經天丙午太白犯左執法癸丑
熒惑犯亢十一月甲戌朔太白犯亢丁亥太陰犯畢
十二月甲辰朔太陰犯羅堰庚申太陰犯軒轅大星
辛酉太白犯填星丙寅太白犯氏 四年二月甲子
太陰犯填星三月丙戌太陰犯太微上將四月甲寅
太陰犯亢熒惑犯壘壁陣癸未太陰犯氏五月乙未

太陰犯太微東垣上相庚戌太陰犯氐七月癸巳太陰掩畢丁酉太陰犯鬼宿距星閏七月丙寅太陰犯軒轅九月乙卯太陰犯畢十月丙申太白犯壘壁陣十一月甲寅太陰犯輿鬼十二月甲辰太白經天癸未亦如之甲申太陰犯太微西垣上將壬辰太白經天

仁宗皇慶元年正月癸丑太陰犯太微東垣上相二月壬午太陰犯亢三月丁酉朔熒惑犯東井壬寅太陰犯東井四月丙子太白晝見壬午熒惑犯輿鬼未熒惑犯積尸氣庚寅太白經天六月己巳太白

天關七月戊午太陰犯東井八月戊辰太白犯軒轅辛未太陰犯填星壬午辰星犯右執法乙酉太白犯右執法丁亥辰星犯左執法九月丁巳太白犯亢十月丁亥太陰犯平道戊子太陰犯亢十一月己亥太陰掩壘壁陣十二月甲申熒惑填星辰星聚井戊子太陰犯熒惑二年正月戊申太陰犯三公三月庚子熒惑犯壘壁陣丁未彗出東井七月己丑朔歲星犯東井辛卯太白晝見乙未丙辰皆如之丁巳太白經天八月戊午朔太白晝見壬戌歲星犯東井壬午太陰犯輿鬼 延祐元年二月癸酉熒惑犯東井三

月壬辰太陰掩熒惑閏三月辛酉太陰犯輿鬼丙寅
 太陰犯太微東垣五月戊午辰星犯輿鬼六月乙未
 熒惑犯右執法十月庚戌辰星犯東咸十二月甲午
 太陰犯輿鬼癸卯太陰犯房甲辰太陰犯天江二
 年正月乙卯歲星犯輿鬼己未太白晝見癸亥太陰
 犯軒轅丁卯太陰犯進賢二月戊子太白晝見癸巳
 太白經天丙午亦如之三月丙辰太陰色赤如赭四
 月庚子太陰犯壘壁陣五月辛酉太陰犯天江庚午
 太白晝見六月甲申太白晝見是夜太陰犯平道癸
 卯太白犯東井丙午辰星犯輿鬼九月己酉太陰犯

房辛酉太白犯左執法十月丙子朔客星見太微垣
 十一月丙午客星變為彗犯紫微垣歷軫至壁十五
 宿明年二月庚寅乃滅 三年九月癸丑太白晝見
 丙寅太白經天十月甲申太白犯斗 四年三月乙
 酉太陰犯箕六月乙巳大陰犯心八月丙申熒惑犯
 輿鬼壬子太陰犯昴九月庚午大陰犯斗 六年正
 月戊寅太陰犯心二月己亥太陰犯靈臺三月己巳
 太陰犯明堂癸酉太陰犯日星甲戌太陰犯心五月
 辛酉太陰犯靈臺丁卯太陰犯房丙子太陰犯壘壁
 陣六月己亥歲星犯東咸七月壬戌太陰犯心丙子

太白犯太微垣右執法八月乙酉熒惑犯輿鬼閏八月丙辰辰星犯太微垣右執法丁巳太陰犯心癸亥熒惑犯軒轅甲子太陰犯壘壁陣乙亥太白犯東咸十月癸亥熒惑犯太微垣左執法乙丑太陰犯昴戊辰太陰犯東井庚午太白晝見辛未太陰犯軒轅辛卯熒惑犯進賢庚子太陰犯明堂十二月丙寅太陰犯軒轅 七年正月乙未太陰犯明堂上星癸卯太陰犯斗宿東星三月辛酉太陰犯軒轅御女壬戌太陰犯靈臺丁卯太陰犯日星庚午太陰犯斗宿距星二月戊子太陰犯酒旗上星熒惑犯進賢庚寅太陰

犯明堂上星四月甲寅太白犯填星壬辰太陰房宿宿距星五月庚寅太陰犯心宿東星癸巳太陰犯狗宿東星丙申太白犯畢宿距星六月庚申太陰犯斗宿東星扇第三星辛未太陰犯昴宿七月丁亥太陰犯斗宿東二星戊戌熒惑犯房宿上星巳亥太陰犯昴宿距星八月丙辰太白犯靈臺上星乙丑熒惑犯天江丁卯太白犯太微垣右執法壬申太陰犯軒轅御女九月乙酉太陰犯壘壁陣西二星丙戌熒惑犯斗宿癸巳太陰犯昴宿東星巳亥太白犯亢星十月庚

戊太陰犯熒惑于斗癸亥太陰犯井宿十一月癸卯
熒惑犯壘壁陣乙卯太陰掩昴宿戊午太陰犯井宿
東星庚申太陰犯鬼宿

英宗至治元年正月乙未太陰掩房宿距星甲辰辰
星犯外屏西第一星辰星太白熒惑填星聚於奎宿
三月壬子太白熒惑填星聚於奎宿辛酉太白犯熒
惑癸亥太陰犯心宿大星又犯心宿東星三月丁丑
太陰掩昴宿四月戊午太陰犯心宿大星庚申太陰
犯斗宿東第三星五月戊寅太白犯鬼宿積尸氣太
陰犯軒轅右角庚辰太陰犯明堂中星六月己未太

陰犯虛梁東臨二星辛酉太白經天七月癸巳太陰
犯昴宿八月辛未太陰犯心宿前星己酉太陰犯井
宿西第二星壬子熒惑犯軒轅大星九月乙亥熒惑
犯靈臺東北星壬午熒惑犯太微西垣上將丁酉熒
惑犯太微垣右執法十月甲辰太白經天戊申熒惑
犯太微垣左執法十一月辛未熒惑犯進賢丙子太
陰犯虛梁東第一星戊寅辰星犯房宿上星丙戌太
陰犯井宿東扇北第二星己丑太陰犯酒旗西星又
犯軒轅右角辛卯太陰犯明堂中星己亥太白犯西
咸南第一星十二月甲辰熒惑犯亢宿南第一星庚

戊太陰犯昴宿東第一星辛酉熒惑入氐宿 二年
正月丁丑太陰犯昴宿距星庚辰太白犯建星西第
二星辛巳太白犯建星西第三星辛卯太陰犯心宿
大星甲午熒惑犯房宿上星丁酉太白犯牛宿南第
一星二月巳亥朔熒惑犯鍵閉星丙午熒惑犯罰星
南一星戊申太陰犯井宿東扇北第二星庚戌熒惑
犯東咸北第二星辛亥太陰犯酒旗西第一星及軒
轅右角星壬子太白犯壘壁陣西方第二星癸丑太
陰犯明堂中星巳未太陰犯天江南第一星壬戌太
白犯壘壁陣第六星五月丙子熒惑退犯東咸南第
一星六月壬申熒惑犯心宿距星七月巳亥熒惑犯
天江南第一星戊午太陰犯井宿越星九月巳未太
陰犯明堂中星十月庚辰太陰犯井宿距星辛巳太
陰犯井宿東扇北第二星及第三星巳丑熒惑犯壘
壁陣西第六星十一月甲辰太白犯壘壁陣第一星
乙巳熒惑犯壘壁陣西第八星戊申太陰掩井宿東
扇北第二星巳未太陰犯東咸南第一星庚申太陰
犯天江上第二星辛酉熒惑犯歲星十二月乙丑太
白歲星熒惑聚于室太白犯壘壁陣西第八星乙亥
太陰掩井宿距星戊寅太白犯歲星巳丑熒惑犯外

屏西第二星太陰犯建星西第二星 三年正月壬寅太陰犯鉞星又犯井宿距星癸卯太陰犯井宿東扇南第二星二月癸亥朔熒惑太白填星聚於胃宿癸酉太白犯昴宿辛巳太陰犯東咸南第一星第二星五月戊戌太白經天癸卯太陰犯房宿第二星庚戌太白犯畢宿右股第三星六月癸未填星犯畢宿距星九月辛卯填星退犯畢十月己巳太白犯亢丙子太白犯氏十一月己丑朔熒惑犯亢庚寅太白犯鈞鈴乙未太白犯東咸壬寅熒惑犯氏十二月己巳辰生犯壘壁陣辛未熒惑犯房辛巳熒惑犯東咸

恭定帝恭定元年五月丙午太白犯鬼宿丁未太白又犯鬼宿積尸氣十月丙寅太白犯斗宿距星己巳太白入斗宿魁太陰犯填星庚午太白犯斗壬午熒惑犯壘壁陣十二月庚午熒惑犯外屏乙亥太白經天 二年正月丙戌辰星犯天鷄壬寅太白犯建星二月庚寅熒惑歲星填星聚于畢宿六月丙戌填星犯井宿鉞星丙午填星犯井宿八月癸巳歲星犯天罇十月壬辰熒惑犯氏宿癸巳填星退犯井宿十一月戊午填星退犯井宿鉞星十二月乙酉熒惑犯天江辰星犯建星甲午太白犯壘壁陣 三年正月辛

酉太白犯外屏三月丙午填星犯井宿鉞星戊辰熒惑犯壘壁陣填星犯井宿庚午填星太白歲星聚于井四月戊戌太白犯鬼宿壬寅熒惑犯壘壁陣七月戊辰太白經天至于十二月九月壬戌太白犯太微垣右執法十月辛巳太白犯進賢前四年正月巳酉太白犯牛宿三月丁卯熒惑犯井宿九月壬子太白犯房宿閏九月巳巳太白經天至十二月十月乙巳晝有流星戊午辰星犯東咸十一月癸酉太白犯壘壁陣熒惑犯天江十二月巳未歲星退犯太微西垣上將致和元年二月壬戌太白晝見五月庚辰流星

如正光明燭地七月丙戌太白犯軒轅大星

文宗天曆元年九月庚辰太白犯亢宿 二年正月

甲子太白犯壘壁陣二月巳酉熒惑犯井宿五月庚

申太白犯鬼宿積尸氣六月丁未太白晝見七月癸

亥太白經天十一月癸酉太陰犯填星 至順元年

七月庚午歲星犯氐宿八月戊辰太白犯氐宿九月

巳丑熒惑犯鬼宿甲午熒惑犯鬼宿十一月甲申熒

惑退犯鬼宿丙戌太白犯壘壁陣 二年二月壬子

太白晝見三月丙子朔熒惑犯鬼宿巳卯熒惑犯鬼

宿積尸氣五月丁丑熒惑犯軒轅左角甲午太白犯

畢宿庚子太陰犯太白辛丑太白經天六月丁未太白晝見丁卯太陰犯畢太白犯井八月乙卯太白犯軒轅太星庚申太白犯軒轅左角九月丙子太白犯填星十一月壬申朔太白犯鈞鈴
三年五月癸酉熒惑犯東井

志卷第一

元史志卷第二

元史四十九

南對京國子監祭酒胡尚英

司業王錫袞 全修

天文二

月五星凌犯及星變下

順帝○元統元年正月癸酉太白晝見二月戊戌亦

如之巳亥填星退犯太微東垣上相丙辰太陰犯天

江下星三月戊寅太陰犯太微東垣上相五月丁酉

熒惑犯太微垣右執法六月丁丑太陰犯壘壁陣西

第二星七月巳亥太陰犯房宿北第二星九月甲午

太陰犯東咸西第一星填星犯進賢乙未太陰犯天
江下星丁巳太陰犯填星巳未太陰犯氏宿距星十
月甲子太陰入犯斗宿魁東北星十一月甲午太陰
犯壘壁陣西方第二星辛亥太陰犯太微東垣上相
壬子太陰犯填星癸丑太陰犯亢宿南第一星癸酉
太陰犯鬼宿東北星乙亥太白犯壘壁陣西第八星
太陰犯軒轅夫人星巳卯太陰犯進賢癸未太陰犯
東咸西第二星 二年正月壬寅太陰犯軒轅夫人
星庚戌太陰犯房宿北第二星二月癸酉太陰犯太
微東垣上相丁亥太白經天三月辛丑太陰犯進賢

又犯填星四月丁丑太白經天戊寅太白晝見辛巳
壬午皆如之壬午夜太白犯鬼宿積尸氣七月巳亥
太白經天甲辰亦如之丙午復如之己酉太白晝見
夜流星如酒盃大色赤尾跡約長五尺餘光明燭地
起自天津之側没于離宮之南庚戌太白經天壬子
熒惑入犯鬼宿積尸氣癸丑太白經天甲寅亦如之
八月丙辰朔太白經天丁巳戊午己未亦如之癸亥
丙寅戌辰辛未壬申癸酉甲戌丁丑己卯皆如之己
卯夜太白犯軒轅御女星庚辰太白經天壬午亦如
之九月庚寅太白經天壬辰太陰入南斗魁癸巳太

陰之狗國東星太白犯靈臺中星甲午太白經天乙
未亦如之己亥壬寅皆如之乙巳太白犯太微垣右
執法壬子太白犯太微垣左執法十月癸亥熒惑犯
太微西垣上將太白犯進賢乙亥太陰犯軒轅夫人
星太白犯填星十一月乙未真星犯亢宿距星庚戌
熒惑犯太微東垣上相仍改至元元年二月甲戌
熒惑通行入太微垣四月壬戌太陰犯太微垣左執
法五月癸卯太陰犯壘壁陣東方第四星六月壬戌
太陰犯宿大星七月乙未太陰犯壘壁陣西方第
二星八月辛丑熒惑犯氐宿東南星九月丁亥太陰

入魁犯斗宿東南星庚寅太陰犯壘壁陣西方第二
星十月甲寅熒惑犯斗宿西第二星庚申太陰犯壘
壁陣東方東第二星甲子太陰犯昴宿西第二星丁
卯太白犯斗宿魁第三星戊辰太白晝見十一月甲
申太白經天丙戌亦如之己丑辰星犯房宿上星及
鉤鈴星丙申太陰犯鬼宿東北星己亥太陰犯太微
西垣上將庚子太陰犯太微垣左執法十二月壬子
太陰犯壘壁陣西方第二星辛酉太白犯壘壁陣東
方第六星甲子太白經天乙丑太陰犯軒轅夫人星
丙寅太白經天丁卯亦如之太陰犯太微垣右執法

庚子太白經天壬申亦如之癸酉歲星晝見乙亥太白歲星皆晝見戊寅太白經天歲星晝見閏十二月乙酉熒惑犯壘壁陣西第八星庚子太陰犯心宿大星壬寅太陰犯箕宿距星癸卯太陰犯斗宿魁東南星二年正月壬戌太陰犯太微垣右執法甲子太陰犯角宿距星丁卯太陰犯房宿距星二月辛巳太陰犯昴宿距星甲申太白經天己丑太陰犯太微西垣右執法三月壬戌太陰犯心宿距星甲子太陰犯箕宿距星乙丑太陰犯斗宿東南星四月丙戌太陰犯角宿距星五月庚戌太陰犯靈臺西第一星五月

丙辰太白晝見丁巳亦如之六月戊子太白犯井宿東扇北第二星七月己酉太白犯鬼宿東南星乙卯太白犯熒惑八月己卯太陰犯心宿東第一星辛巳太陰犯箕宿東北星九月庚戌熒惑犯太微西垣上將十月丙子熒惑犯太微垣左執法丁亥太陰犯昴宿己亥熒惑犯進賢十一月己酉太陰犯壘壁陣西第八星己未太陰犯鬼宿積尸氣丁卯太陰犯房宿距星三年三月辛亥太陰犯靈臺上星四月辛卯太陰犯壘壁陣西方第五星庚子太白晝見五月壬寅太白犯鬼宿東北星乙巳太陰犯軒轅左角戊申

元史志卷二
四
太白晝見壬子太陰犯心宿後星戊午太白晝見巳
未太陰犯壘壁陣西方第六星辛酉太白晝見丁卯
彗星見於東北如天船星大色白約長尺餘彗指西
南測在昴五度六月庚午太白經天辛未亦如之甲
戌復如之乙亥太白犯靈臺上星巳卯太白經天夜
太白犯太微西垣上將壬午太白晝見太陰犯斗宿
魁尖星丁亥太白犯太微垣右執法巳丑太白晝見
庚寅亦如之七月癸卯太白經天乙巳亦如之丙午
復如之庚戌太白晝見甲寅太白經天辛酉太白晝
見壬戌太白經天癸亥甲子皆如之八月庚午彗星

不見其星自五月丁卯始見戊辰往西南行日益漸
速至六月辛未芒彗愈長約二尺餘丁丑掃上丞巳
卯光芒愈甚約長三尺餘入園衛壬午掃華蓋杠星
乙酉掃鉤陳大星及天皇大帝丙戌貫四輔經樞心
甲午出園衛丁酉出紫微垣戊戌犯貫索掃天紀七
日庚子掃河間癸卯經鄭晉入天市垣丙午掃列肆
己酉太陰光盛微辨芒彗出天市垣掃梁星至辛酉
光芒微小瞻在房宿鍵閉之上罰星中星正西難測
日漸南行至是凡見六十有三日自昴至房凡歷一
十五宿而滅甲戌太陰犯心宿後星九月巳亥熒惑

犯斗宿西第二星甲辰太陰犯斗宿魁第二星丁未
太陰犯壘壁陣西第二星巳酉太陰犯壘壁陣西第
八星辛酉太陰犯軒轅大星十月庚午太白晝見丙
子太陰犯壘壁陣西方第七星壬午太陰犯昴宿上
行星丁亥太白晝見太陰犯鬼宿積尸氣庚寅太白
晝見辛卯亦如之丙申復如之十一月丁酉太白經
天戊戌太陰犯亢宿距星巳亥太白經天壬寅太陰
犯熒惑鬼卯太陰犯壘壁陣西第六星丁未填星犯
鍵閉辛亥太陰犯五車東南星甲寅太陰犯鬼宿西
北星丙辰太陰犯軒轅左角丁巳太白經天太陰犯

太微垣三公東南星戊午太白經天癸卯亦如之甲
子乙丑皆如之十二月巳巳歲星退犯天鐔東北星
填星犯罰星南第一星甲戌熒惑犯壘壁陣東第西
星太白犯東咸上星○四年正月癸卯太白犯建星
西第二星甲辰太白犯建星西第三星丙午太陰犯
五車東南星辛亥太陰犯軒轅左角巳未填星犯東
咸上星庚申太陰入斗魁太白犯牛宿二月戊寅太
陰犯軒轅大星巳卯太陰犯靈臺中星三月戊寅填
星退犯東咸上星六月辛巳填星退犯建閉星閏八
月巳亥填星犯罰星南第一星太陰犯斗宿南第二

星庚戌太陰犯昴宿南第二星乙卯太陰犯鬼宿東
南星九月丙寅太陰犯斗宿距星戊辰太白犯東咸
上第二星癸酉奔星如酒盃大色白起自右旗之下
西南行沒於近濁甲申太陰犯軒轅御女乙酉太陰
犯靈臺南第一星庚寅太白犯斗宿北第二星十月
辛亥太陰犯酒旗上星十一月辛未熒惑犯氐宿距
星丁丑太陰犯鬼宿東南星戊寅太白犯壘壁陣西
第六星十二月庚子熒惑犯房宿上星癸卯太白經
天巳酉庚戌辛亥皆如之壬子熒惑犯東咸上第二
星乙卯太白犯外屏西第二星太陰犯斗宿距星丙

辰太白經天○五年正月庚午太陰犯井宿東扇上
星乙亥熒惑犯天江上星二月甲午太陰犯昴宿上
西第一星壬寅太陰犯靈臺下星四月壬寅太陰犯
日星及犯房宿距星五月庚午太陰犯心宿後星壬
申太陰犯斗宿西第四星丙子太白犯畢宿右股西
第三星六月甲辰熒惑退入南斗魁內七月辛酉熒
惑犯南斗魁尖星壬戌亦如之甲子復如之太陰犯
房宿距星甲戌太白經天乙亥丙子亦如之戊寅乙
酉丙戌皆如之八月戊子太白經天巳丑庚寅辛卯
皆如之甲午太陰犯斗宿西第四星丁酉太白犯軒

轅大星戊戌太白經天巳亥亦如之壬寅甲辰皆如
之乙巳太陰犯昴宿上行西第三星九月戊午太白
經天巳未亦如之十月巳亥熒惑犯壘壁陣西方第
六星十一月丁巳熒惑犯壘壁陣東方第五星十二
月甲午太陰犯昴宿距星癸卯熒惑犯外屏西第三
星○六年正月丁卯太陰犯鬼宿距星乙亥太陰犯
房宿距星二月巳丑太陰犯昴宿丙申太陰犯太微
西距上將癸卯大陰犯心宿大星丁未太陰犯羅堰
南第一星戊申熒惑犯月星巳酉彗星如房星大色
白狀如粉絮尾跡約長五寸餘彗指西南測在房七

度漸往西北行太陰犯虛梁南第二星三月癸亥太
陰犯軒轅右角庚午太陰犯房宿距星壬申太陰犯
南斗杓第二星丙子太陰犯虛梁南第一星戊午太
白犯月星辛巳是夜彗星不見自二月巳酉至三月
庚辰凡見三十二日四月巳巳太陰犯雲南西北星
五月丁卯太陰犯斗宿西第二星辛未太陰犯虛梁
西第二星六月癸卯太白晝見巳酉亦如之辛亥復
如之辛亥夜太白犯歲星又太白歲星皆犯右執法
七月甲寅太白晝見丁巳亦如之庚申太陰犯心宿
距星又犯心中央大星壬戌太白晝見癸亥亦如之

甲子太陰犯羅堰乙丑太白晝見丙寅亦如之癸酉復如之九月辛酉太陰犯虛梁北第一星丁卯太陰犯昴宿距星熒惑犯歲星甲戌太陰犯軒轅右角十月丁酉太白入南斗魁巳亥太白犯斗宿中央東星十一月乙卯太陰犯虛梁西第一星戊午熒惑犯氏宿距星丙寅辰星犯東咸上第一星戊寅辰星犯天江北第一星十二月癸未太陰犯虛梁北第一星乙酉太陰犯土公東星丁亥熒惑犯鉤鈴南星乙未熒惑犯東咸北第二星戊戌太陰犯明堂星○至正元年正月甲寅熒惑犯天江上星庚申太陰犯井宿東

扇北第二星辛未太陰犯心宿距星癸酉太陰犯斗宿北第二星甲戌太白晝見乙亥丙子丁丑皆如之二月巳卯太白晝見庚辰亦如之丙戌復如之癸巳太陰犯明堂東南星三月癸酉太陰犯雲雨西北星六月庚午太陰犯井宿距星七月乙酉太陰犯填星庚寅太陰犯雲雨西北星九月庚辰太陰犯建星南第二星壬辰太陰犯鉞星又犯井宿距星十月巳卯歲星犯氐宿距星丁巳太陰犯月星十一月巳亥太陰犯東咸南第一星庚子太陰犯天江北第二星十二月丁巳太白犯壘壁陣東方第五星○二年正月

戊子太陰犯明堂北第二星甲午熒惑犯月星三月
 戊子太陰犯房宿北第二星四月庚申太陰犯羅堰
 上星五月甲申太白經天七月乙未太陰掩太白丁
 酉太白晝見八月丙午太白晝見九月丁丑太陰犯
 羅堰北第一星戊子太陰犯井宿東扇南第一星十
 月癸卯太陰犯建星北第三星甲寅太陰犯天關十
 一月辛卯歲星熒惑太白聚於尾宿○三年二甲辰
 辰太陰犯井宿西扇北第二星填星犯牛宿南第一
 星熒惑犯羅堰南第一星乙卯太陰犯氐宿東南星
 三月壬午太陰犯氐宿東南星七月庚辰太白犯右

執法○四年十二月壬申太陰犯外屏西第二星○

七年七月丙辰太陰犯壘壁陣東第四星十一月庚

戌太陰犯天廩西北星○八年二月庚辰太陰犯軒

轅左角癸未太陰犯平道東星三月丙辰太陰犯建

星西第一星八月丙子太陰犯壘壁陣西方第五星

九月己未太陰犯靈臺東北星○九年正月庚戌太

白犯建星東第三星辛亥太陰犯平道西星二月甲

申太陰犯建星西第二星三月己亥太白犯壘壁陣

東方第六星七月丙午太陰犯壘壁陣東方南第一

星癸丑太陰犯天關九月丙戌熒惑犯靈臺上星十

一月戊辰太陰犯畢宿左股北第三星庚辰太白犯壘壁陣西方第二星十二月戊戌太白犯壘壁陣東方第五星○十年正月壬申太陰犯熒惑二月辛丑太陰犯平道東星甲辰太陰犯鍵閉三月巳卯熒惑犯太陰西垣上將四月丙午太白犯鬼宿西北星七月辛酉太陰犯房宿北第一星辛未太白晝見壬申丁丑壬午皆如之八月癸未朔太白晝見丁酉亦如之九月癸丑朔太白晝見壬戌熒惑犯天江南第二星十月癸巳歲星犯軒轅大星丙申太陰犯昴宿右股東第二星十一月戊辰太陰犯鬼宿東北星十二

月乙未太陰犯鬼宿西北星十一年正月丙戌辰星犯斗宿西南星二月庚寅太陰犯鬼宿東北星乙未太陰犯太微東垣上相丁酉太陰犯亢宿距星三月丁卯太陰犯東咸第二星戊辰太陰犯天江西第一星七月巳未太陰犯斗宿東第三星壬戌太白犯右執法甲子太陰犯壘壁陣東方第一星巳巳太白犯太微垣左執法熒惑入犯鬼宿積尸氣八月巳酉太陰犯天江南第二星九月乙卯辰星犯太微垣左執法丁巳太白犯房宿第二星戊辰太陰犯鬼宿東北星十月戊寅熒惑犯太微西垣上將辛巳太陰犯

斗宿距星乙酉太白犯斗宿西第二星巳丑太白晝見熒惑犯歲星辛卯太白犯斗宿西第四星癸巳歲星犯右執法丙午熒惑犯太微垣左執法十一月辛亥孛星見於奎宿癸丑孛星見於婁宿甲寅孛星見於胃宿乙卯亦如之丙辰孛星見於昴宿丁巳太陰犯填星孛星微見於畢宿丁卯太白晝見庚午歲星晝見十二月丙子太白晝見丁丑太白經天庚辰亦如之夜太白犯壘壁陣西第六星甲申太陰犯填星丙戌太白經天夜太白犯壘壁陣西第七星辛卯太白經天壬辰亦如之甲午復如之丁酉太白晝見太

陰犯熒惑庚子太白經天辰星犯天江西第二星辛丑太白經天壬寅太白晝見西十二年正月乙丑太陰犯熒惑巳巳歲星犯右執法二月庚寅太陰犯太微東垣上相癸巳太陰犯氐宿距星三月戊午太陰犯進賢壬戌太陰犯東咸西第一星戊辰太白晝見五月癸酉太白犯填星六月辛亥太白犯井宿東第二星七月丁酉辰星犯靈臺北第二星八月丁卯太白犯歲星九月壬辰太陰犯軒轅南第三星十月戊午太陰犯鬼宿東北星甲子太陰犯歲星乙丑太陰犯亢宿南星一星十一月庚寅太陰犯太微東垣上

相十三年正月乙酉太陰犯太微東垣上相戊戌
熒惑太白辰星聚於奎宿二月巳酉太陰犯軒轅南
第三星庚戌太白犯熒惑壬子太陰犯太微東垣上
相四月辛丑太白犯井宿東扇北第一星辛亥太陰
犯房宿北第二星五月乙亥太陰犯歲星七月戊辰
太白晝見九月庚寅太陰犯熒惑壬辰太白經天熒
惑犯左執法十月庚子太白經天甲辰歲星犯氐宿
距星癸亥太白犯亢宿距星十一月壬申太陰犯壘
壁陣東方第四星十二月丁酉太白犯東咸北第一
星庚子熒惑入氐宿丁巳太陰犯心宿距星 十四

年正月乙丑熒惑犯歲星丁卯太白犯建星西第二
星癸酉熒惑犯房宿北第一星二月戊午太白犯壘
壁陣西第八星六月甲辰太陰入斗宿南第一星七
月乙丑太陰犯角宿距星壬午太陰犯昴宿距星十
月壬子太陰犯太微垣右執法十一月丙子太陰犯
鬼宿東北星十二月巳亥太陰掩昴宿 十五年正
月戊辰太陰犯五車東南星辛未太陰犯鬼宿東北
星閏正月丁未太陰犯心宿後星丙辰太白經天三
月庚寅太陰犯五車東南星五月丙申太陰犯房宿
距星癸丑太白經天六月癸亥太白經天八月戊寅

太白晝見九月乙丑太白晝見夜太白入犯太微垣
左執法庚寅太白晝見十月己未太陰犯壘壁陣西
方第二星癸酉太陰犯軒轅大星十一月乙酉熒惑
犯氏宿距星庚寅填星退犯井宿東扇北第二星己
亥太陰犯鬼宿東北星十二月癸丑熒惑犯房宿北
第一星十六年正月己丑太陰犯昴宿西第一星
四月癸亥熒惑犯壘壁陣西方第四星五月壬辰太
白犯鬼宿西北星癸巳太白犯鬼宿積尸氣甲午太
陰入犯斗宿南第二星丁酉太陰犯壘壁陣西方第
三星八月丁卯太陰犯昴宿西北星甲戌彗星見於

正東如軒轅左角大色青白彗指西南約長尺餘測
在張宿十七度一十分至十月戊午滅跡西北行四
十餘日十一月丁亥流星如酒盃大色青白尾跡約
長五尺餘光明燭地起自西北東南行沒於近濁有
聲如雷壬辰太陰犯井宿東扇上星十七年二月
癸丑太陰犯五車東南星三月甲申太陰入犯鬼宿
積尸氣又犯東南星壬辰歲星犯壘壁陣西南第六
星七月癸未太白入犯鬼宿積尸氣甲申太陰入犯
斗宿距星丁亥填星入犯鬼宿距星八月癸卯填星
犯鬼宿東南星太白犯軒轅大星己酉歲星犯壘壁

陣西方第六星甲子太陰犯五車尖星閏九月癸卯
飛星如酒盃大色青白光明燭地尾跡約長尺餘起
自王良沒於勾陳之下丙午太陰犯斗宿南第三星
庚申太陰犯井宿東扇北第一星十月乙亥熒惑犯
氐宿距星甲申太陰掩昴宿十二月庚午朔熒惑犯
天江北第一星戊寅太白犯歲星庚辰太白犯壘壁
陣東方第五星甲申太陰犯鬼宿距星丁亥歲星犯
壘壁陣東方第五星癸巳太陰犯心宿後星己亥申
時流星如金星大尾跡約長三尺餘起自太陰近東
往南行沒後化爲青白氣 十八年正月辛丑填星

退入犯鬼宿積尸氣丙午太陰犯昴宿二月乙亥填
星入守鬼宿積尸氣三月丁卯太白在井宿失行於
北生芒角熒惑犯壘壁陣東方第六星四月辛卯太
白入犯鬼宿積尸氣五月壬寅太白化填星壬子太
陰犯斗宿東第三星七月丁未太陰犯斗宿南第三
星戊申太白晝見八月壬申太陰掩心宿大星甲申
太陰掩昴宿距星十月己卯太陰犯昴宿距星十一
月丙午太陰犯昴宿距星太白犯房宿上第一星辛
酉太陰掩心宿大星十二月戊寅太白生黑芒環繞
太白乍東乍西乍動乍靜癸未太白生黑芒忽明忽

暗乍東乍西戊子太陰犯房宿南第二星 十九年
正月辛丑太陰犯昴宿東第一星癸丑流星如酒盃
本色赤尾跡約長五尺餘起自南河沒於騰蛇其星
將沒迸散隨落處有聲如雷二月庚戌太陰犯房宿
距星五月丙申熒惑入犯鬼宿積尸氣丙午太陰犯
天江南第一星丁未太陰犯斗宿北第二星七月丁
酉太白犯上將甲辰太白犯右執法巳酉太白犯左
執法月月甲寅太白入犯天江南第一星十月壬申
太白入犯斗宿南第三星辛巳流星如桃大色黃潤
後離一尺又一小星相隨色赤尾跡通約長三尺餘

起自危宿之東緩緩東行沒於畢宿之西十二月戊
辰太白犯壘壁陣西方第七星二十年正月巳亥
太陰犯井宿東扇北第二星丙辰熒惑犯牛宿東角
星四月丁卯太陰犯明堂中星癸酉太陰犯東咸西
第一星五月癸卯太陰犯建星西第二星閏五月乙
亥流星如桃大色赤尾跡約長丈餘起自房宿之側
緩緩西行沒於近濁六月癸巳太白犯井宿東扇北
第二星戊戌太陰犯建星西第三星七月丁丑太陰
犯井宿距星八月辛卯太陰犯天江北第二星壬寅
填星犯太微西垣上將甲辰太陰犯井宿鉞星十月

戊子熒惑犯井宿東扇北第一星 二十一年正月
庚申太陰犯歲星二月癸未填星退犯太微西垣上
將壬寅太陰犯天江北第一星三月丙辰太陰犯井
宿西扇第二星庚辰熒惑入犯鬼宿西北星五月壬
戌太陰犯房宿北第二星癸酉太白犯軒轅左角甲
戌熒惑犯太白六月乙未熒惑歲星太白聚于翼宿
戊戌太陰犯雲雨上二星甲辰太白晝見七月丙辰
太陰犯氏宿東南星十月甲申太陰犯牛宿距星十
一月庚戌太陰犯建星西第四星癸亥太陰犯井宿
東扇北第四星壬申太陰犯氏宿東南星 二十二

年正月戊申朔太白犯建星西第二星乙卯填星退
犯左執法二月巳卯太白犯壘壁陣西方第二星乙
酉彗星見光芒約長尺餘色青白測在危七度二十
分丁酉彗星犯離宮西星至二月終光芒約長二丈
餘三月戊申彗星不見星形惟有白氣形曲竟天西
指掃大角壬子彗星行過太陽前惟有星形無芒如
酒盃大昏濛色白測在昴宿六度至戊午始滅跡焉
四月丁亥熒惑離太陽三十九度不見當出不出五
月辛酉太陰犯建星西第四星六月辛巳彗星見於
紫微垣測在牛二度九十分色白光芒約長尺餘東

南指西南行戊子彗星光芒掃上宰七月乙卯彗星
滅跡八月癸巳太陰犯畢宿右股第二星九月丁未
太白犯亢宿南第一星巳酉太陰犯斗宿北第一星
癸亥歲星犯軒轅大星丙寅熒惑犯鬼宿西北星巳
巳流星如酒盃大色青白光明燭地熒惑入犯鬼宿
積尸氣十月巳卯太陰犯牛宿距星丁亥辰星犯亢
宿南第一星戊子太陰犯畢宿距星十二月壬辰太
陰犯角宿距星二十三年正月庚戌歲星退犯軒
轅大星二月戊戌太白晝見庚子亦如之三月丙辰
太陰犯氐宿距星四月辛丑熒惑犯歲星庚申歲星

犯軒轅大星五月壬午太白晝見甲午亦如之乙未
熒惑犯右執法六月乙卯太白犯井宿西扇北第二
星壬戌太白晝見夜太白入犯井宿東扇南第二星
七月乙酉太白晝見丙戌辛卯皆如之八月壬寅太
白入犯軒轅大星乙巳太陰犯建星東第二星丁未
太白犯軒轅左角巳酉太白晝見壬子亦如之丙辰
太陰犯畢宿右股北第二星巳未太白晝見辛酉太
白犯歲星乙丑太白入犯右執法九月辛未太白入
犯左執法乙亥歲星入犯右執法丁丑辰星犯填星
丁亥太白犯填星辰星犯亢宿南第一星十月癸卯

太白犯氐宿距星戊午太白犯房宿北第一星十一月癸未太陰犯軒轅右角歲星犯太微垣左執法二十四年正月癸酉太陰犯畢宿太星戊寅太陰犯軒轅右角二月壬子歲星自去年九月九日東行入右掖門犯右執法出端門留守三十餘日犯左執法今逆行入端門西出右掖門又犯右執法太陰犯西咸南第一星四月丁未太陰犯西咸南第一星癸丑太白入犯井宿東扇北第一星五月甲戌太白犯鬼宿西北星乙亥又犯積尸氣歲星入犯右執法六月丁巳太白犯右執法七月癸亥太白與歲星相合於

翼宿二星相去八寸餘甲子歲星犯左執法八月丁未熒惑入犯鬼宿積尸氣九月乙丑太白晝見甲申太陰犯軒轅右角戊子熒惑入犯軒轅大星十月丙午太陰犯畢宿大星巳酉太陰犯井宿東扇南第一星丙辰太白犯斗宿西第二星十二月巳卯太陰犯太白○二十五年正月丁卯太白晝見戊辰亦如之太陰犯畢宿右股東第四星甲戌太白犯建星西第四星二月丙午太陰犯填星三月戊辰太白犯壘壁陣東方第五星四月壬子熒惑犯靈臺東北星五月辛酉熒惑犯太微西垣上將流星如酒盃大色青白

光明燭地起自房宿之側緩緩西行沒於太微垣右
執法之下七月丁丑填星歲星熒惑聚於角亢巳卯
太陰犯畢宿左股北第二星八月乙未太陰犯建星
東第三星巳亥太陰犯壘壁陣東方第六星九月丁
丑太陰犯井宿東扇南第一星十月辛卯熒惑犯天
江東第二星巳酉熒惑犯斗宿杓星西第二星太陰
犯右執法庚戌太陰犯太微東垣上相閏十月戊辰
太白辰星熒惑聚於斗宿太陰犯畢宿右股北第四
星又犯左股北第三星壬申太白犯辰星十一月巳
丑太白犯熒惑太陰犯壘壁陣東方第五星丙申太

陰犯畢宿大星癸卯太陰犯太微西垣上將十二月
丙辰太陰犯太白癸亥太陰犯畢宿右股第二星庚
午歲星掩房宿北第一星辛未太陰犯太微垣右執
法○二十六年正月戊戌太陰犯太微西垣上將辛
丑太陰犯亢宿距星二月戊午太陰犯畢宿大星丁
丑歲星退行犯房宿北第一星歲星守鉤鈴三月甲
午太陰犯左執法四月巳未太陰犯軒轅大星乙丑
太陰犯西咸西第一星丙子太白入犯鬼宿積尸氣
六月癸酉流星如酒盃大色青白尾跡約長尺餘起
自心宿之側東南行光明燭地沒於近濁七月丁酉

熒惑犯鬼宿積尸氣甲辰太白晝見丙午丁未戊申
皆如之八月辛亥太白晝見己未太陰掩牛宿南三
星庚午歲星犯鈎鈴乙亥太陰掩軒轅大星九月壬
辰太白犯太微垣右執法庚子孛星見於紫微垣北
斗權星之側色如粉絮約斗大往東南行過犯天棊
星辛丑孛星測在尾十八度五十分壬寅孛星測在
女二度五十分癸卯孛星測在女九度九十分甲辰
孛星測在虛初度八十分太陰犯太微西垣上將乙
巳孛星出紫微垣北斗權星玉衡之間在於軫宿之
南行過犯天棊經漸臺輦道去虛宿壘壁陣西方星

始消滅焉丙午熒惑犯太微西垣上將十一月乙酉
太白犯填星丁亥太白犯房宿北第一星戊子熒惑
犯太微東垣上相太白犯鍵閉己丑流星如酒盃大
分爲生星緊相隨前星色青明後二星色赤尾跡約
長二丈餘起自東北緩緩往西南行沒於近濁庚寅
太陰犯畢宿右股北第四星丙申太白歲星辰星聚
於尾宿庚子太陰犯太微東垣上相辛丑填星犯房
宿北第一星甲辰太白犯歲星十二月戊午太陰犯
畢宿大星庚申太陰犯井宿西扇北第二星乙丑太
陰犯軒轅左角丙寅太陰犯太微西垣上將辛未太

陰犯西咸西第一星甲戌太陰犯建星西第三星
二十七年正月癸巳太陰犯太微西垣上將二月乙
卯太陰犯井宿西扇北第二星三月辛巳填星退犯
鍵閉星四月丙寅太陰犯壘壁陣西方第四星六月
乙卯太陰犯氐宿東辛星辛未太陰犯井宿西扇北
第二星七月壬辰熒惑犯氐宿東南星丙申太陰犯
畢宿太星巳亥太陰犯井宿東扇南第二星八月庚
戌熒惑犯房宿北第二星癸丑太陰犯建星西第二
星九月丁丑填星犯房宿北第一星熒惑犯天江南
第一星乙酉太陰犯壘壁陣東方第六星辛卯填星
犯鍊閉太陰犯畢大星癸巳太陰犯井宿西扇北第
二星丁酉熒惑犯斗宿西第二星十月戊午太陰犯
畢宿右股西第二星辛酉太一犯井宿東扇南第三
星癸亥太陰犯鬼宿西南星丁卯歲星太白熒惑聚
於斗宿十一月戊寅太白晝見庚辰太陰犯壘壁陣
東方南東第一星餘見本紀

志卷第二

卷之三十一
志卷第三十一

東方南東第一星宿員本路

於中宿十一日又寅太白晝見吳吳太白知晝時

星突多太食少星宿西南星宿太食少

畢宿古宿西第一星宿西太

二星丁酉焚海外十宿西第一星宿

外難開太知外畢大星

志卷第三十一

元史五十

南京國子監祭酒侯恪

其職正副以行司業謝德溥補修

未向五行

人與天地參為三極災祥之興各以類至天之五運

地之五材其用不窮其初一陰陽耳陰陽一太極耳

而人之生也全付畀有之具為五性著為五事又著

為五德脩之則吉不脩則凶吉則致福焉不吉則致

禍焉徵之於天吉則休徵之所應也不吉則咎徵之

所應也天地之氣無感不應天地之氣應亦無物不

咸而况天子建中和之極身為神人之主而心範圍天地之妙其精神常與造化相流通若桴鼓然故軒轅氏治五氣高陽氏建五官夏后氏脩六府自身而推之於國莫不有政焉其後箕子因之以衍九疇其言天人之際備矣漢儒不明其大要如夏侯勝劉向父子競以災異言之班固以來采爲五行志又不攷求向之論著本於伏生生之大傳言六沴乍見若是共禦五福乃降若不共禦六極其下禹乃共辟厥德爰用五事建用王極後世君不見極臣不加省顧乃執其類而求之感矣否則判而二焉如宋儒王安石

之論亦過也天人感應之機豈易言哉故無變而無不脩省者上也因變而克自脩省者次之災變旣形脩之而莫知所以脩省之而莫知所以省又次之其下者災變並至敗亡隨之訖莫脩省者刑戮之民是已歷放往古存亡之故不越是數者元起朔漠方太祖西征角端見于東印度爲人語云汝主宜早還意者矣告之以止殺也憲宗討八赤蠻于寬田吉思海會大風吹海水盡涸濟師大捷憲宗以爲天導我也以此見五方不殊性其於畏天有不待教而能者世祖若有天下方地旣廣郡邑災變益不絕書而妖孽

禍皆非有可言狀則亦不得具見昔孔子作春秋所紀災異多矣然不著其事應聖人之知猶天也故不妄意天欲人心自謹焉乃本洪範倣春秋之意攷次當時之災祥作五行志

五行一曰水潤下水之性也失其性爲沴時則霧水暴出百川逆溢壞鄉邑溺人民及凡霜雹之變是爲水不潤下其徵恒寒其色黑是爲黑眚黑祥至元元年真定順天河間順德大名東平濟南等郡大水四年五月應州大水五年八月亳州大水六年十二月獻其濤滄四州及豐州渾源縣大水九年九月南陽

懷孟衛輝順天等郡洺磁泰安通灤等州滏雨河水並溢圯田廬害稼十三年十二月濟寧及高麗瀋州水十四年六月濟寧路雨水平地丈餘損稼曹州定陶武清二縣濮州堂邑縣雨水沒禾稼十二月冠州永年縣水十六年十二月保定等路水十七年正月磁州永平縣水八月大都北京懷孟保定東平濟寧等路水十八年二月遼陽懿州蓋州水十一月保定清苑縣水二十年六月大原懷孟河南等路沁河水涌溢壞民田一千六百七十餘頃衛輝路清河溢損稼南陽府唐鄧裕嵩四州河水溢損稼十月涿州巨

馬河溢二十一年六月保定河間濱棣大水二十二
年秋南京彰德大名河間順德濟南等路河水壞田
三千餘頃高郵慶元大水傷人民七百九十五戶壞
廬舍三千九十區二十三年六月安西路華州華陰
縣大雨潼谷水涌平地三丈餘杭州平江二路屬縣
水壞民田一萬七千二百頃大都涿瀋檀順薊五州
汴梁歸德七縣水二十四年六月霸州益津縣雨水
九月東京誼靜威遠婆娑等處水二十五年七月膠
州大水民采橡爲食十二月太原汴梁二路河溢害
稼二十六年二月紹興大水十月平灤路水壞田稼
一千一百頃二十七年正月甘州無爲路大水五月
江陰州大水六月河溢大康縣沒民田三十一萬九
千畝八月沁水溢廣州清遠縣大水十一月河決祥
符義唐灣大康通許二縣陳穎二州大被其患二十
八年二月常德路水八月浙東婺州水九月平灤保
定河間三路大水二十九年五月龍興路南昌新建
進賢三縣水六月鎮江常州平江嘉興湖州松江紹
興等路府水揚州寧國太平三郡大水岳州華容縣
水三十年五月深州靜安縣大水十月平灤路水三
十一年八月趙州寧晉縣水十月遼陽路水元貞元

年五月建康溧陽州太平當塗縣鎮江金檀丹徒等
縣常州無錫州平江長洲縣湖州烏程縣鄞陽餘干
州常德沅江澧州安鄉等縣水六月泰安州奉符曹
州濟陰兗州磁陽等縣水歷城縣大清河水溢壞民
居七月遼東和州大都武衛屯田水九月廬州平江
二郡大水二年五月太原平晉縣獻州交河樂壽二
縣莫州任丘莫亭等縣湖南醴陵州水六月大都路
益津保定大興三縣水損田稼七千餘頃真定古城
獲鹿藁城等縣保定葛城歸信新安束鹿等縣汝寧
潁州濟寧沛縣揚廬岳澧四郡建康大平鎮江常州

紹興五郡水八月棣州曹州水九月河決河南杞封
丘祥符寧陵襄邑五縣十月河決開封縣十二月江
陵潛江縣沔陽玉沙縣淮安海寧朐山鹽城等縣水
大德元年三月歸德徐州邳州宿遷濰寧鹿邑三縣
河南許州臨潁鄆城等縣睢州襄邑太康扶溝陳留
開封杞等縣河水大溢漂沒田廬五月河決汴梁發
民夫三五萬千塞之漳水溢害稼龍興南康澧州南
雄饒州五郡水六月和州歷陽縣江水溢漂廬舍一
萬八千五百區七月郴州來陽縣衡州鄱縣大水溺
死三百餘人七月溫州平陽瑞安二州水溺死六千

八百餘人十一月常德武陵縣大水二年六月河決蒲口凡九十六所泛溢汴梁歸德二郡大名東昌平灤等路水三年八月河間郡水四年五月保定真定二郡通薊二州水六月歸德睢州大水五年五月宣德保定河間屬州水寧海州水六月濟寧般陽益都東平濟南襄陽平江七郡水七月江水暴風大溢高四五丈連崇明通泰真州定江之地漂沒廬舍被災者三萬四千八百餘戶遼陽大寧路水八月平灤郡西灤河溢順德路水六年四月上都大水五月濟南路大水歸德府徐州邳州睢寧縣雨五十日沂武二

河合流乎大溢東安州渾河溢壞民田一千八十餘頃六月廣平路大水七年五月濟南河間等路水六月遼陽大寧平灤昌國瀋陽開元六都雨水壞田廬男女死者百十有九人脩武河陽新野蘭陽等縣趙河白河白河七里河沁河潦河皆溢台州風水大作寧海臨海二縣死者五百五十人八年五月太原陽武縣衛輝獲嘉縣汴梁祥符縣河溢大名滑州濬州雨水壞民田六百八十餘頃八月潮陽颶風海溢漂民廬舍九年六月汴梁武陽縣思齊口河決東昌博平堂邑二縣雨水潼川鄆縣雨總江中江溢水決入

城龍興撫州臨川三郡水七月沔陽玉沙縣江溢嶧
州水揚州泰興縣淮安山陽縣水八月歸德府寧陵
陳畱通許扶溝太康杞縣河溢大名元城縣大水十
年五月雄州鄂州水平江嘉興二郡水害稼六月保
定蒲城清苑二縣雨水大名益都定興等路大水七
月平江路大風海溢吳江州大水十一年六月靖海
容城東鹿隆平新城等縣水七月冀寧文水縣汾水
溢十一月盧龍灤河遷安昌黎撫寧等縣水至大元
年七月濟寧路雨水平地丈餘暴決人城漂廬舍死
者十有八人真定路滏雨大水入南門下注橐城死

者百七十人彰德衛輝二郡水損稻田五千二百七
十頃二年七月河決歸德府又決汴梁封丘縣三年
六月洧川鄆城汶上三縣水峽州大雨水溢死者萬
餘人七月循州惠州大水漂廬舍二百九十區四年
六月大都玉河縣潞縣河東祁縣懷仁縣永平豐盈
屯雨水害稼七月東平濟寧般陽保定等路大水江
陵松滋縣桂陽臨武縣水皇慶元年五月歸德睢陽
縣河溢六月大寧水達達路雨宋瓦江溢民避居亦
母兒乞嶺八月松江府大風海水溢二年五月辰州
沅陵縣水六月涿州范陽縣東安州宛平縣固安州

霸州益津永清永安等縣雨水壞田稼七千六百九十餘頃河決陳毫睢三州開封陳留等縣八月崇明嘉定二州大風海溢延祐元年五月常德路武陵縣雨水壞廬舍溺死者五百人六月涿州范陽房山二縣渾河溢壞民田四百九十餘頃七月沅陵廬溪二縣水八月肇慶武昌建康杭州建德南康江州臨江袁州建昌贛州安豐撫州等路水二年六月河決鄭州壞汜水縣治七月京師大雨鄭州昌平香河寶坻等縣水全州永州江水溢害稼三年四月潁州泰和縣河溢七月婺源州雨水溺死者五千三百餘人四

年正月解州鹽池水五年四月廬州合肥縣大雨水六年六月河間路漳河水溢壞民田二千七百餘頃益都般陽濟南東昌東平濟寧等路曹濮泰安高唐等州大雨水害稼遼陽廣寧瀋陽永平開元等路水大名路屬縣水壞民田一萬八千頃汴梁歸德汝寧彰德真定保定衛輝南陽等郡大雨水七年四月安豐廬州淮水溢損禾麥一萬頃城父縣水五月江陵縣水六月棣州德州大雨水壞田四千六百餘頃七月上蔡汝陽西平等路水八月霸州文安文成二縣滹沱河溢害稼汾州平遙縣水是歲河決汴梁原武

縣至治元年六月霸州大水渾河溢被災者三萬餘
戶七月薊州平谷漁陽二縣順州行臺沙河二縣大
名魏縣永平石城縣大水彰德臨漳縣漳水溢大都
固安州真定轅氏縣東安寶坻縣淮安清河山陽等
縣水東平東昌二路高唐曹濮等州雨水害稼乞墾
吉恩部江水溢八月安陸府雨七日江水大溢被災
者三千五百戶雷州海康遂溪二縣海水溢壞民田
四千頃九月京山長壽二縣漢水溢十月遼陽肇慶
等郡水二年正月儀封縣河溢二月濮州大水閏五
月睢陽縣亳社屯大水六月奉元郿縣邠州新平上

蔡二縣水八月廬州六安舒城二縣水十一月平江
路大水損民田四萬九千六百頃二年五月東安州
水壞民田一千五百餘頃真定武邑縣水害稼六月
大都永清縣雨水損田四百頃七月瀋州雨水害稼
九月漳州建昌南康等郡水泰定元年五月瀋州固
安州水隴西縣大雨水漂死者五百餘家龍慶路雨
水傷稼六月益都濟南般陽東昌東平濟寧等郡二
十有二縣曹濮高唐德州等處十縣淫雨水深丈餘
漂沒田廬大同渾源河溢陳汾順晉恩深六州雨水
害稼真定滹沱河溢漂民廬舍陝西大雨渭水及黑

兩廂侯謝修
水河溢損民廬舍渠州江水溢七月真定河間保定
廣平等郡三十有七縣大雨水五十餘日害稼大都
路固安州清河溢順德路任縣沙澧洛水溢奉元朝
邑縣曹州楚丘縣開州濮陽縣河溢九月延安路洛
水溢奉元長安縣大雨澧水溢濮州館陶縣水十二
月杭州鹽官州海水大溢壞隄堊侵城郭有司以石
固木櫃捍之不止二年正月大都寶坻縣肇慶高要
縣雨水鞏昌路水閏正月雄州歸信縣大水二月廿
州路大雨火漂沒行帳孳畜三月咸平府清寇二河
合流失故道隳堤堰四月涿州房山范陽二縣水氓

洮又階四州雨水五月檀州大水平地深丈有五尺
高郵興化江陵公安二縣水河溢汴梁被災者十有
五縣六月冀寧路汾河溢潼江府綿江中江水溢入
城深丈餘衛輝汲縣歸德宿州雨水濟寧路虞城碭
山單父豐沛五縣水七月睢州河決八月霸州涿州
永清香河二縣大水傷稼九千五十餘頃九月開元
路三河溢沒民田壞廬舍十月寧夏鳴沙州大雨水
三年正月恩州水二月歸德府河決六月大同縣大
水汝寧光州水七月河決鄭州漂沒陽武等縣民一
萬六千五百餘家東安檀順滹四州雨渾河決温榆

兩廂侯謝修
水溢傷稼延安路膚施縣水漂民居九十餘戶八月
鹽官州大風海溢捍海隄崩廣三十餘里袤二十里
徙居民千二百五十家以避之真定蠡州奉元蒲城
縣無爲州歷陽含山等縣水九月平遙縣汾水溢十
一月崇明州三沙鎮海溢漂民居五百家十二月遼
陽大水大寧路瑞州大水壞民田五千五百頃廬舍
八百九十所溺死者百五十人四年正月鹽官州潮
水大溢捍海隄崩二千餘步四月復崩十九里發丁
夫二萬餘人以木柵竹落磚石塞之不止六月大都
東安固安通順薊檀灤七州永清良鄉等縣雨水七

月上都雲州大雨北山黑水河溢雲安縣水八月汴
梁扶溝蘭陽二縣河溢漂民居一千九百餘家濟寧
虞城縣河溢傷稼十二月夏邑縣河溢汴梁中牟開
封陳留三縣歸德邳宿二州雨水致和元年三月鹽
官州海隄崩遣使禱祀造浮圖二百十六用西僧法
壓之河決碭山虞城二縣四月鹽官州海溢益發軍
民塞之置石圍二十九里六月南寧開元永平等路
水河間林邑縣雨水益都濟南般陽濟寧東平等郡
三十縣濮德泰安等州九縣雨水害稼七月廣西兩
江諸州水天曆元年八月杭州嘉興平江湖州建德

鎮江池州太平廣德九郡水沒民田萬四千餘頃二年六月大都東安通薊霸四州河間靖海縣雨水害稼永平昌國諸屯水至順元年六月河決大名路長垣東明二縣沒民田五百八十餘頃曹州高唐州水七月海潮溢漂沒河間運司鹽二萬六千七百引閏七月平江嘉興湖州松江三路一州大水壞民田三萬六千六百餘頃被灾者四十萬五千五百餘戶杭州常州慶元紹興鎮江寧國等路望江銅陵長林寶應興化等縣水沒民田一萬三千五百餘頃大都保定大寧益都屬州縣水二年四月潞州潞城縣大雨水五月河間莫亭縣寧夏河渠縣紹慶彭水縣及德安屯田水六月彰德屬縣漳水決十月吳江州大風太湖水溢漂民居一千九百七十餘家十二月深州晉州水三年三月奉元朝邑縣洛水溢五月汴梁河水溢江都泰興雲夢應城等縣水六月汾州大水至元十四年九月湖州長興縣金沙泉自唐宋以來用以造茶其泉不常有今漢然涌出溉田可數百頃有司以聞錫名瑞應泉十五年十二月河水清自孟津東栢谷至汜水縣蓼子谷上下八十餘里澄瑩見底數月始如故元貞元年閏四月蘭州上下三百餘里

河清三日中統二年五月西京隕霜殺禾三年五月
 宣德咸寧等路隕霜八月河間平灤等路隕霜害稼
 四年四月武州隕霜殺麥禾至元二年八月太原隕
 霜七年四月檀州隕霜八年七月鞏昌會蘭等州霜殺稼
 十七年四月益都隕霜二十一年三月山東隕霜殺桑
 蠶盡死被災者三萬餘家二十七年七月大同平陽太
 原隕霜殺禾二十九年三月濟南般陽等郡及恩州屬
 縣霜殺桑元貞二年八月金復州隕霜殺禾大德五年
 二月湯陰縣霜殺麥五月南州霜殺麥六年八月大同
 太原霜殺禾七年四月霜殺麥八年三月濟陽灤城二

縣霜殺桑八月隕霜殺稼九年三月河間益都般陽三
 郡屬縣隕霜殺桑清莫滄獻四州霜殺桑五百四十一
 萬七千餘本壞蚕一萬二千七百餘箔十月七月大同
 渾源縣霜殺禾八月綏德州米脂縣霜殺禾二百八十
 頃至大元年八月大同隕霜殺禾皇慶二年三月濟
 寧霜殺桑延祐元年三月東平般陽等郡泰安曹濮
 等州大雨雪三日隕霜殺桑閏三月濟寧汴梁等路
 及隴州開州青城涇源諸縣霜殺桑無蚕七月冀寧
 隕霜殺稼四年夏六盤山隕霜殺稼五百餘頃五年
 五月雄州歸信縣隕霜六年二月奉元路同州隕霜

七年八月益津縣雨黑霜至治三年七月冀寧曲寧
縣大同路大同縣興和路咸寧縣隕霜八月袁州宜
春縣隕霜害稼泰定二年三月雲需府大雪民饑天
曆三年二月京師大霜盡零至順元年閏七月奉元
西和州寧夏應理州鳴沙州鞏昌靜寧邠會等州鳳
翔麟遊大同山陰晉寧潞城隰川等縣隕霜殺稼中
統三年四月雨雹大如彈丸三年五月順天平陽真
定河南等郡雨雹四年七月燕京昌平縣景州蓟縣
開平路興松雲三州雨雹害稼至元二年八月彰德
大名南京河南濟南太原等郡雨雹二月三月夏津

縣大雨雹五年六月中山大雨雹六年七月西京大
同縣雨雹七年五月河內縣大雨雹十五年閏十一
月海州贛榆縣雨雹傷稼十九年八月雨雹大如鷄
卵二十年四月河南風雷雨雹害稼五月安西路風
雷雨雹八月真定元氏縣大風雹禾盡損二十二年
七月冠州雨雹二十四年九月大定金源高州武平
興中等處雨雹二十五年三月靈壁虹縣雨雹如鷄
卵害麥十二月靈壽陽曲天成等縣雨雹二十六年
夏平陽大同保定等郡大雨雹二十七年四月靈壽
縣大風雹六月棣州獻次濟陽二縣大風雹傷禾黍

菽麥桑棗一十九年閏六月遼陽瀋州廣寧開元等
路雨雹三十一年四月卽墨縣雨雹八月德州德安
縣大風雨雹元貞元年五月鞏昌金州會州西和州
雨雹大無麥禾七月隆興路雨雹元貞二年五月河
寧猗氏縣雨雹六月隆興咸寧縣順德邢臺縣大原
交河離石壽陽等縣雨雹八月懷孟武陟縣雨雹大
德元年六月太原崞州雨雹害稼二年二月檀州雨
雹八月彰德安陽縣雨雹四年三月宣州涇縣台州
臨海縣風雹八年五月大寧路建州蔚州靈仙縣雨
雹太原大同隆興屬縣陽曲天成懷安白登風雹害

稼八月營州嵐州交城陽曲懷仁等縣雨雹九年六
月晉寧冀寧宣德隆興大同等郡大雨雹害稼十年
四月鄭州管城縣風雹大如鷄卵積厚五寸五月大
雨雹七月宣德縣雨雹十六年五月建州雨雹至大
元年四月般陽新城縣濟南狀次縣益都高苑縣風
雹五月管城縣大雹深一尺無麥禾八月大寧縣雨
雹害稼斃畜牧二年三月濟陰定陶等縣雨雹六月
崞州源州金城縣雨雹延安神禾縣大雹一百餘里
擊死人畜三年四月靈壽平陰等縣雨雹四年四月
南陽雨雹閏七月宣寧路雨雹皇慶元年四月大名

濬州彰德安陽縣河南孟津縣雨雹六月開元路風
雹害稼二年七月冀寧平定州雨雹景州阜城縣風
雹八月大同懷仁縣雨雹延祐元年五月膚施縣大
風雹損稼并傷人畜六月宣平仁壽白登等縣雨雹
二年五月大同宣德等郡雷雹害稼三年五月薊州
雹深四尺五年四月鳳翔府雹傷麥禾六年六月大
同縣雨雹大如鷄卵七月鞏昌隴西縣雹害稼七年
八月大同路雷風雨雹至治元年六月武州雨雹害
稼永平路大雹深一尺害稼七月真定順德等郡雨
雹二年四月涇州涇川縣雨雹六月思州大風雨雹

三年五月大風雨雹拔柳林行宮大木泰定元年五
月冀寧陽曲縣雨雹傷稼思州龍泉平雨雹傷麥六
月順元太平軍定西州雨雹七月龍慶路雨雹大如
鷄卵平地深三尺餘八月大同白登縣雨雹二年四
月奉元白水縣雨雹五月洮州路可當縣臨洮府狄
邑縣雨雹六月興州鄜州靜寧州及成紀通渭白水
膚施安塞等縣雨雹七月檀州雨雹三年六月鞏昌
路大雨雹中山府安喜縣乾州永壽縣雨雹七月房
山寶坻玉田永平等縣大風雹折木傷稼八月龍慶
路雨雹一尺大風損稼四年七月彰德湯陰縣冀寧

定襄縣大同武應二州雨雹害稼致和元年四月濬
州涇州大雹傷麥禾五月冀寧陽曲縣威州并涇縣
雨雹六月涇川湯陰等縣大雨雹大寧永平屬縣雨
雹天曆二年七月大寧惠州雨雹八月冀寧陽曲縣
大雹如鷄卵害稼三年七月順州東安州及平棘肥
鄉曲陽行唐等縣風雹害稼開元路雨雹至順二年
十二月冀寧清源縣雨雹三年五月甘州雨雹乙巳
天鼓鳴于西北中統二年九月河南民王四妻靳氏
一產三男唐志云物反常為妖陰氣盛則母道壯也
至元元年八月武城縣王氏妻崔一產三男十年八

月甲寅鳳翔寶鷄縣劉鐵牛妻一產三男二十年二
月高州張丑妻李氏一產四子三男一女四月固安
州王得林妻張氏懷孕五月生一男四手四足圓頭
三耳一耳附腦後生而即死具狀有司上之二十八
年九月襄陽南障縣民李氏妻王一產三子大德元
年五月遂寧州軍戶任福妻一產三男十一月遼陽
打鴈亭蘭奚戶那懷妻和里迷一產四男四年寶應
縣民孫奕妻朱氏一產三男十年正月江州湖口縣
方丙妻甘氏一產四男泰定元年十月乙卯秦州成
紀縣趙思直妻張氏一產三子致和元年三月壬辰

太平當塗縣楊太妻吳氏一產三子
五行二曰火炎上火之性也失其性爲沴董仲舒云
陽失節則火災出於是而濫炎妄起災宗廟燒宮館
雖興師衆弗能掾也是爲火不炎上其徵恒燠其色
赤是爲赤眚赤祥定宗三年戊申野草自焚牛馬十
死八九民不聊生至元十一年十二月淮西正陽火
廬舍鎧仗悉燬十八年二月楊州火元貞二年杭州
火燔七百七十家大德八年五月杭州火燔四百家
九年三月宜黃縣火十年武昌路火延祐元年二月
真州楊子縣火二年六月重慶路火郡舍十焚八九

六年四月楊州火焚官民廬舍一萬三千三百餘戶
至治二年四月楊州真州火十二月杭州火三年五
月奉元路行宮正殿火上都利用監庫火九月揚州
江都縣火燔四百七十餘家泰定元年五月江西袁
州火燔五百餘家三年六月龍興路寧州高市火燔
五百餘家七月龍興奉新州辰州辰溪縣火八月杭
州火燔四日七十餘家四年八月龍興路火十二月
杭州火燔六百七十家天曆二年三月四川紹慶彭
水縣火四月重慶路火延二百四十餘家七月武昌
路江夏縣火延四百家十二月江夏縣火燔四百餘

家三年二月河內諸縣火皇慶元年冬無雪詔禱嶽
瀆延祐元年大都檀薊等州冬無雪至春草木枯無
至元二年八月丙寅濟南鄒平縣進芝一本八年八
月癸酉益都津州進芝二本十五年四月濟南歷城
縣進芝十九年六月芝生眉州青城縣景德寺二十
三年四月丁未江東宣慰司進芝一本十月濟寧進
芝一本二十六年三月癸未東流縣獻芝四月池州
貴池縣民王逸進紫芝十二本六月汲縣民朱良造
紫芝二十八年三月芝生鈞州翟陽縣二十九年六
月芝生賀州大德五年十二月興元西鄉縣進芝一

本色如珊瑚六年正月濟南鄒平縣進芝一本五枝
五葉色皆赤至大四年八月芝生國學大成殿延祐
二年三月芝生大成殿五年七月芝生大成殿元統
二年正月辛未御帳殿受朝賀是夜東北有赤氣照
人大如席

五行三曰木曲直木之性也失其性為沴故主不暢
茂為變異者有之是為木不曲直其徵恒雨其色青
是為青青祥大德七年十一月辛酉木冰至順二
年十一月丁巳雨水冰十二月癸亥雨水冰元貞元
年太平路蕪湖縣進榆木有文曰天下太平年至治

三年五月庚子柳林行宮大風木拔三千七百株至元十七年二月真定七郡桑有蟲食之二十九年五月滄州濰州中山元氏無棣等縣桑蟲食葉蠶不成元貞元年四月真定中山靈壽二縣桑有蟲食之大德五年四月彰德廣平真定願德大名等郡蟲食桑至大元年五月大名廣平真定三郡蟲食桑致和元年六月河南德安屯蠖食桑天曆二年三月滄州高唐州及南皮塩山武城等縣桑蟲食之如枯株至順二年二月冠州蟲食桑四萬株晉冀深蠶等州及鄆城延津二縣蟲夜食桑晝匿土中人莫捕之五月曹

州禹城保定博野東昌封丘等縣蟲食桑皆既至元九年六月丁亥京師大雨二十四年九月太原河間河南等路霖雨害稼二十五年七月保定郡霸瀨二州淫雨害稼八月嘉祥魚臺金鄉三縣淫雨九月莫獻二州淫雨保定路淫雨二十六年六月濟寧東平汴梁濟南順德真定平灤棣州霖雨害稼二十八年八月大名清河南樂諸縣霖雨爲災九月河間郡淫雨至大四年七月河間順德大名彰德廣平等路德濮恩通等州及河東祈縣霖雨害稼皇慶元年隆興路新建縣雨害稼延祐四年四月遼陽蓋州雨水害

稼六年七月霸州文成縣雨害稼三千餘頃至治元年江州贛州滏雨二年閏五月安豐路雨傷稼三年五月大名魏縣滏雨保定定興縣濟南無棣猷次縣濟寧碭山縣河間齊東縣霖雨害稼泰定元年七月真定廣平廬州十一郡雨傷稼元年八月汴梁考城議討濟南湯化利津等縣霖雨損禾稼

五行四曰金從革金之性也失其性爲沴時則冶鑄不成變異者有之是爲金不從革金石同類故古者以類附見其徵恒暘其色白是爲白眚白祥至元十三年霧靈山伐木官劉氏言檀州大峪錐山出鐵鑛

有司覆視之尋立四冶大德元年雲州聚陽山等冶言鑛石煽煉銅貨不出詔減其課額二年六月撫州崇仁縣辛陂村有星隕于地爲綠色員石邑人張椿以狀聞泰定四年八月天全道山崩飛石擊人中者輒死庶徵之恒陽劉向以爲春秋大旱也京房易傳曰欲得不用茲謂張厥災荒荒旱也中統三年五月濱棣二州旱四年八月真定郡及洛磁等州旱至元元年二月東平太原平陽旱分命西僧禱雨五年十二月京兆大旱八年四月蔚州靈仙廣靈二縣旱九年六月高麗旱十三年十二月平陽路旱十六年七

月趙州旱十八年二月廣寧北京大定州旱二十三年五月汴梁旱京畿旱二十四年春平陽旱二麥枯死二十五年東平路瀕城等六縣安西路商耀乾華等十六州旱二十六年絳州大旱元貞元年六月環州葭州及咸寧伏羌通渭等縣旱七月河間肅寧樂壽二縣旱泗洲賀州旱二年八月大名開州懷孟武陟縣河間肅寧縣旱九月莫州獻州旱十月化州旱十二月遼東開元二路旱大德元年六月汴梁南陽大旱民鬻子女九月鎮江丹陽金壇二縣旱十二月平陽曲沃縣旱一年五月衛輝順德平灤等路旱三

年五月荆湖諸郡及桂陽寶慶興國三路旱十月揚廬隨黃等州旱四年平棘白馬二縣旱五年六月汴梁南陽衛輝大名等路旱九月江陵旱八年六月鳳翔扶風岐山寶鷄三縣旱九年七月晉州饒陽縣漢陽漢川縣旱八月象州融州柳州屬縣旱十年五月京畿旱安西春夏大旱二麥枯死至大三年夏廣平亢旱皇慶元年六月濱棣德三州及蒲臺陽信等縣旱二年九月京畿大旱延祐二年春檀薊濠三州旱夏鞏昌蘭州旱四年四月德安府旱五年七月真定河間廣平中山大旱七年六月黃蘄二郡及荆門軍

元至治元年六月大同路旱二年十一月岷州旱三年夏順德真定冀寧大旱泰定元年六月景清滄莫等州臨汾涇川靈臺壽春六合等縣旱九月建昌郡早二年五月潭州茶陵州興國永興縣旱七月隨州息州旱三年夏燕南河南州縣十有四亢陽不雨七月關中旱四年二月奉元醴泉順德唐山邠州淳化等縣旱六月潞霍綏德三州旱八月藤州旱致和元年二月廣平彰德等郡旱天曆元年八月陝西大旱人相食二年夏真定河間大名廣平等四州四十一縣旱峽州二縣旱八月浙西湖州江東池州饒州旱

十二月冀寧路旱至順元年七月肇州興州東藤州及榆次滏陽等十三縣旱二年霍隰石三州阜城平地二縣旱恒暘則有介蟲之孽釋者謂小蟲有甲爪揚之類陽氣所生也於春秋爲蟲今謂之蝗按劉曹云貪虐取民則螽與魚同占劉向以爲介蟲之孽當厲言不從今倣之中統三年五月真定順天邢州蝗四年六月燕京河間益都真定東平蝗八月濱棣等州蝗至元二年七月益都大蝗十二月西京北京順德徐宿邳等州郡蝗五年六月東平等郡蝗七年七月南京河南諸路大蝗八年六月上都中都大名河

間益州順天懷孟彰德濟南真定衛輝平陽歸德順
德等路淄萊洛磁等州蝗十六年四月大都十六路
蝗十七年五月忻州及漣海邳宿等州蝗十九年四
月別十八里部東三百餘里蝗害麥二十五年七月
真定汴梁蝗八月趙晉冀三州蝗二十七年四月河
北十七郡蝗二十九年六月東昌濟南般陽歸德等
郡蝗三十一年六月東安州蝗元貞元年六月汴梁
陳畱太康考城等縣睢許等州蝗二年六月濟寧等
城魚臺縣東平瀕城汶上縣開州長垣靖豐縣德州
郡河縣滑州大和州內黃縣蝗八月平陽大名歸德

真定等郡蝗大德元年六月歸德邳州徐州蝗二年
四月燕南山東兩淮江浙蘇南屬縣百五十處蝗三
年五月淮安屬縣蝗有鶩食之十月隴陝蝗五年六
月順德路洪州蝗七月廣平真定等路蝗八月河南
淮南睢陳唐和等州新野汝陽江都興化等縣蝗六
年四月真定大名河間等路蝗七月大都涿順固安
三州及濠州鍾離鎮江丹徒二縣蝗七年五月益都
濟南等路蝗六年大寧路蝗八年四月益都臨胸德
州齊河縣蝗八年六月益津縣蝗九年六月通泰靖
海武清等州縣蝗八月涿州良鄉河間南皮泗州天

長等縣及東安海鹽等州蝗十年四月大都真定河間保定河南等郡蝗六月龍興南康等郡蝗至大元年五月晉寧路蝗六月保定真定二郡蝗八月淮東蝗二年四月益都東平東昌順德廣平大名汴梁衛輝等郡蝗六月檀霸曹濮高唐泰安等州良鄉舒城歷陽合肥大安江寧句容溧水上元等縣蝗七月濟南濟寧般陽河中解絳耀同華等州蝗八月真定保定河間懷孟等郡蝗三年四月寧津堂邑茌平陽穀平原齊河禹城七縣蝗七月磁州威州饒陽元氏平棘滏陽元城無棣等縣蝗皇慶元年彰德安陽縣蝗

延祐七年六月益都路蝗至治元年五月霸州蝗六月衛輝汴梁等處蝗七月江都泰興古城通許臨淮盱眙清池等縣蝗十二月寧海州蝗二年汴梁祥符縣蝗有羣鶯食蝗既而復吐積如丘垤三年五月保定路歸信縣蝗泰定元年六月大都順德東昌衛輝保定益都濟寧彰德真定般陽廣平大名河間東平等郡蝗二年五月彰德路蝗六月德濮曹景等州歷城章丘淄川柳城茌平等縣蝗九月濟南歸德等郡蝗三年六月東平須城縣興國永興縣蝗七月大名順德廣平等路趙州曲陽滿城慶都修武等縣蝗淮

安高郵二郡睢泗雄霸等州蝗八月永平汴梁懷慶等郡蝗四年五月洛陽縣有蝗五畝羣鳥盡食之越數日蝗又集又食之七月籍田蝗八月冠州恩州蝗十二月保定濟南衛輝濟寧廬州五路南陽河南二府蝗博興臨淄膠西等縣蝗致和元年四月大都薊州永平路石城縣蝗鳳翔岐山縣蝗無麥苗五月潁州及汲縣蝗六月武功縣蝗天曆二年四月大寧興中州懷慶孟州廬州無爲州蝗六月益都莒密二州蝗七月真定汴梁永平淮安廬州大寧遼陽等郡屬縣蝗三年五月廣平大名般陽濟寧東平汴梁南陽

河南等郡輝德濮開高唐五州蝗至順元年六月鄴薊固安博興等州蝗七月解州華州及河內靈寶延津等二十二縣蝗二年三月陝州諸路蝗六月孟州濟源縣蝗七月河南閩鄉陝縣奉元蒲城白水等縣蝗至元十五年四月濟南無棣縣獲白雉以獻元貞三年正月海州牟平縣獲白鹿于聖水山以獻至元二十四年七月癸丑日暈連環白虹貫之至大元年七月流星起勾陳化爲白氣員如車輪至貫索始滅皇慶元年六月丁卯天雨毛延祐元年二月己亥白暈亘天連環貫日至順三年五月丁酉白虹並日出

其長竟天

五行五日土土中央生萬物者也而莫重於稼穡土氣不養則稼穡不成金木水火沴之衝氣爲異爲地震爲天雨土其徵恒風其色黃是爲黃青黃祥中統元年五月澤州益州饑二年六月塔察兒部饑七月桓州饑三年五月甘州饑閏九月濟南郡饑至元二年四月遼東饑五年九月益都饑六年十一月濟南饑十一月固安高唐二州饑七年五月東京饑七月山東淄萊等州饑八年正月西京益都饑九年四月京師饑七月水達達部饑十七年三月高郵郡饑十

八年二月湖東饑四月通泰崇明等州饑十九年八月真定路饑民流徙鄂州二十三年七月宣寧路饑二十四年九月平灤路饑十二月蘇常湖秀四州饑二十五年十一月兀良合部饑二十六年二月合木裏部饑三月安西甘州等路饑四月遼陽路饑閏十月武平路饑檀州饑十二月蠡州饑河間保定二路饑二十七年二月開元路寧遠縣饑四月浙東婺州饑河間任丘保定定興二縣饑九月河東山西道饑二十八年三月真定河間保定平灤太原平陽等路饑杭州平江鎮江廣德太平徽州饑九月武平路饑

兩府侯謙修
十二月洪寬女直部饑大都內郡饑二十九年正月
清州興州饑三月輝州龍山縣里州和中縣饑東安
固安薊棣四川饑三月威寧昌州饑閏六月南陽懷
孟衛輝等路饑三十年十月京師饑元貞二年四月
平陽絳州太原陽曲台州黃巖饑大德元年六月廣
德路饑七月寧海州文登牟平等縣饑三年八月楊
州淮安等郡饑四年二月湖北饑三月寧國太平二
路饑九月建康常州江陵等郡饑六年五月福州饑
六月杭州嘉興湖州廣德寧國饒州太平紹興慶元
婺州等郡饑大同路饑七月建康路饑十一月保定

路饑七年二月真定路饑五月太原龍興南康袁州
瑞州撫州等路高唐南豐等州饑六月浙西饑七月
常德路饑八年六月烏撒烏蒙益州忙步東川等路
饑九年三月常寧州饑五月寶慶路饑八月揚州饑
十年三月濟州任城饑四月漢陽淮安道州柳州饑
七年黃州沅州永州饑八月成都饑十一月揚州辰
州饑至大元年二月益都般陽濟寧濟南東平泰安
大饑六月山東河南江淮等郡大饑二年七月徐州
邳州饑皇慶元年六月鞏昌河州路饑二年三月晉
寧大同大寧四川鞏昌甘肅等郡饑四月真定保定

河間等路饑五月順德冀寧二路饑六月上都饑延
祐元年六月衡州饑七月台州饑十二月歸德汝寧
沔陽安豐等郡饑二年正月晉寧宣德懷孟衛輝益
都般陽等路饑二年十二月漢陽路饑三年二月河
間濟南濱棣等處饑四月遼陽益州及南豐州饑五
月寶慶桂陽澧州潭州永州道州袁州饑四年正月
汴梁饑五年四月上都饑六年八月山東濟寧饑七
年五月大同雲南豐勝諸郡邑饑瀋陽路饑八年廣
東新州新城縣饑至治元年正月蘄州蘄水縣饑二
月河南汴梁歸德安豐等路饑五月膠州濮州饑七

月南恩新州饑十一月鞏昌成州饑十二月慶遠真
定二路饑二年三月河南淮東淮西諸郡饑延安延
長宜川二縣饑奉元路饑四月東昌霸州饑九月臨
安河西縣饑三年二月京師饑三月平江嘉定州饑
崇明黃巖二州饑十一月鎮江丹徒沅州黔陽縣饑
十二月歸澧二州饑泰定元年正月惠州新州南恩
州信州上饒縣廣德路廣德縣岳州臨湘華容等縣
饑二月慶元紹興二路綏德州米脂清間二縣饑三
月臨洮狄道縣石州離石縣饑四月江陵荆門軍監
利縣饑五月贛州吉安臨江等郡崑山南恩等州饑

八月黃寧延安江州安陸杭州建昌常德全州桂陽
辰州南安等路屬州縣饑九月紹興南康二路饑十
一月泉州饑中牟延津二縣饑二年正月梅州饑祿
施英德二州饑閏正月河間真定保定瑞州四郡饑
二月鳳翔路饑三月薊瀛徐邳等州饑濟南肇慶江
州惠州饑四月杭州鎮江寧國南安潯州潭州等路
饑五月廣德袁州撫州饑六月寧夏路饑九月瓊州
成州饑德慶路饑十二月濟南延川等郡饑三年三
月河間保定真定三路饑三月大都永平奉元饑十
一月瀋陽大寧永平廣寧金復州甘肅亦集乃路饑

四年正月遼陽諸郡饑二月奉符長清萊蕪三縣饑
建康淮安蘄州屬縣饑四月通薊等州漁陽永清等
縣饑七月武昌江夏縣饑致和元年二月乾州饑三
月晉寧冀寧奉元延安等路饑四月保定東昌般陽
彰德大寧五路屬縣饑五月河南東平大同等郡饑
七月威寧長安縣涇州靈臺縣饑天曆二年正月大
同及東勝州饑涿州房山范陽等縣饑四月奉元耀
州乾州華州及延安邠寧諸縣饑流民數十萬大都
興和順德大名彰德懷慶衛輝汴梁中興等路泰安
高唐曹冠徐邳等州饑江東淅西二道饑八月忻州

饑十月漢陽武昌常德澧州等路饑鳳翔府大饑三年正月寧海州文登牟平縣饑懷慶衡州二路饑真定汝寧揚廬蘄黃安豐等郡饑二月河南大饑三月東昌須城堂邑縣饑沂莒膠密寧海五州臨清定陶光山等縣饑葦昌蘭州定西州饑四月德州清平縣饑至順二年二月集慶嘉興二郡及江陰州饑檀順維密昌平五州饑六月興和路高原咸平等縣饑九月思州鎮遠府饑十二月河南大饑三年四月大理中慶路饑五月常寧州饑七月滕州饑八月大都寶坻縣饑至太元年春紹興慶元台州疫死者二萬六

千餘人皇慶三年冬京師大疫唐志云國將有恤邪亂之氣先被于民故疫太宗五年癸巳十二月大風霾凡七晝夜至元二十年正月汴梁延津封丘三縣大風麥苗盡拔延祐七年八月延津縣大風晝晦桑隕者十八九至治元年三月大同路大風走沙土壅沒麥田一百餘頃三年三月衛輝路大風桑彫蠶死泰定三年七月寶坻房山二縣大風折木八月大都昌平等縣大風一晝夜壞民居九百餘家四年五月衛輝路輝州大風九日禾盡偃天曆三年二月胙城縣新鄉縣大風按漢志云溫而風則生螟螣有裸

蟲之孽至元八年六月遼州和順縣解州聞喜縣好
蚘生十八年高唐夏津武城縣蠹二十三年五月霸
州瀋州蝻二十四年鞏昌好蚘為災二十七年四月
婺州螟害稼雷雨大作螟盡死歲乃大稔元貞元年
六月利州龍山縣蓋州民山縣螟二年五月濟州任
城縣螟隨州野蠶成繭亘數百里民取為繭大德七
年五月濟南東昌般陽益都等路蟲食麥閏五月汴
梁開封縣蟲食麥九年七月桂陽郡蝻至大元年五
月東平東昌益都等郡蝻皇慶二年五月檀州及獲
縣蝻延祐七年七月霸州及堂邑縣蝻泰定四年

月奉元路咸陽興平武功三縣鳳翔府岐山等縣
好蚘害稼天曆二年淮安廬州安豐三路屬縣蝻至
元十六年四月益都樂安縣朱五十家牛生犛犢兩
頭四耳三尾其色黃既生即死大德九年二月大同
平地縣迷兒的斤家牛生麒麟而死至大四年大同
宣寧縣民威的家牛生一犢其質有麟無毛其色青
黃類若麟者以其鞞上之泰定三年九月湖州長興
州民王俊家牛生一獸麟身牛尾口目皆赤墮地即
大鳴母不乳之具圖以上不知何獸或曰此瑞也宏
俾吏臣紀錄至元二十四年諸王薛徹都部雨土七

晝夜沒歿牛畜大德十年二月大同平地縣雨沙黑
霾斃牛馬二千至治三年二月丙戌雨土致和元年
三月壬申雨霾天曆二年三月丁亥雨土霾至順二
年三月丙戌雨土霾至元一十一年九月戊子京師
地震按傳云陽伏而不能出陰迫而不能升於是
地震二十六年正月丙戌地震二十七年二月癸未
泉州地震丙戌泉州地復震八月癸未武平路地大
震二十八年八月己丑平陽路地震壞廬舍萬八百
區元貞元年三月壬戌地震大德六年十二月辛酉
雲南地震戊戌亦如之七年八月辛卯夕地震太原

平陽尤甚壞官民廬舍十萬計平陽趙城縣范宣義
郇堡徙十餘里太原徐溝祁縣及汾州平遙介林西
河孝義等縣地震成渠泉涌黑沙汾州北城陷長一
里東城陷七十餘步八年正月平陽地震不止九年
四月己酉大同路地震有聲如雷壞廬舍五千八百
壓死者一千四百餘人懷仁縣地震二所涌水盡黑
其一廣十八步深十五丈其一廣六十六步深一丈
五月癸亥以地震改平陽路爲晉寧太原路爲冀寧
十一月壬子大同地震十二月丙子地震十年正月
晉寧冀寧地震不止十一年三月道州營道縣暴雨

山裂百三十餘處八月壬寅開城路地震至大元年
 六月丁酉鞏昌隴西寧遠縣地震雲南烏撒烏蒙地
 三日而大震者六九月巳酉蒲縣地震十月癸巳蒲
 縣靈縣地震二年十二月壬戌陽曲縣地震有聲三
 年十二月戊申冀寧路地震四年三月巳亥寧夏路
 地震七月癸未甘州地震大風有聲如雷閏七月甲
 子寧夏地震皇慶二年六月京師地震巳未京師地
 震丙辰又震壬寅又震延祐元年二月戊辰大寧路
 地震四月甲申朔大寧地震有聲如雷八月丁未冀
 寧汴梁等路陟縣武安縣地震十一月戊辰大寧地

震如雷二年五月乙丑秦州成紀縣北山移至夕川
 河明日再移平地突如土阜高者二三丈陷沒民居
 三年八月巳未冀寧晉寧等郡地震十月壬午河南
 地震四年正月壬戌冀寧地震七月巳丑成紀縣山
 崩辛卯冀寧地震九月嶺北地震三日五年正月甲
 戌懿州地震二月癸巳和寧路地震丁酉秦安縣山
 崩三月巳卯德慶路地震七月戊子寧遠縣山崩八
 月伏羌縣山崩秦州成紀縣暴雨山崩朽壞墳起覆
 沒畜產至治二年九月癸亥地震十一月癸卯地震
 泰定元年八月成紀縣大雨山崩水溢壅土至來谷

河成丘阜十二月庚申奉元路同州地震有聲如雷
三年十二月丁亥寧夏路地震如雷發自西北連震
者三四年三月癸卯和寧路地震如雷八月鞏昌通
渭縣山崩礪門地震有聲如雷晝晦鳳翔興元成都
陝州江陵等郡地同日震九月壬寅寧夏地震至和
元年七月辛酉朔寧夏地震已卯大寧路地震十月
壬寅大寧路地震至順二年四月丁亥真定陟縣地
一日五震或三震月餘乃止四年四月戊申大寧路
地震五月戊寅京師地震有聲八月己酉隴西地震
至元元年十月壬子恩州歷亭縣進嘉禾一莖九穗

十一月丁酉太原臨州進嘉禾二莖四年十月庚午
太原進嘉禾二本異畝同穎六年九月癸丑恩州進
嘉禾一莖三穗七年夏東平府進瑞麥一莖五穗十
一年興元鳳州進麥一莖七穗穀一莖三穗十四年
八月嘉禾生襄陽十七年十月太原堅州進嘉禾六
莖十八年八月壬寅瓜州屯田進瑞麥一莖五穗二
十年癸巳翰端宣慰司劉恩進嘉禾同穎九穗七穗
六穗者各一二二十二年五月廣元路閬中麥秀兩岐
二十四年八月濬州進瑞麥一莖五穗二十五年八
月袁州萍鄉縣進嘉禾二十六年十二月寧州民張

安世進嘉禾二本三十二年嘉禾生京畿一莖九穗
大德元年十一月辛未曹州禹城縣進嘉禾一莖九
穗大德九年嘉禾生應州山陰縣至大三年九月河
間路獻嘉禾有異畝同穎及一莖數穗者勅繪爲圖
皇慶二年八月嘉禾生渾源州一莖四穗延祐四年
七月南城產嘉禾七年五月鄱陽進嘉禾一莖六穗
至治二年八月蔚州獻嘉禾泰定元年十月城都縣
麥一莖九穗

志卷第三上

